


# *KWANGATA NSAKWA*

## *YABALWANYI BABO KE YABO*

 Mwabuka byepi lukeelo luno, bantu bonse. Kabiji ke lusekelo kubwela jibiji lukeelo luno pa tabbanako, na kulombelela bantu bakolwa leelo. Ke, javula, jo tusaka kutwelamo, kimye kyonse, kabiji—kabiji na kulombelelako bantu bafuma mu mampuzha apusanapusana, beya ku milombelo.

Kabiji pano tukayanga katatakatu, pano, ku mbung'eno ya ku California ne Kukitulu kya Kumusela. Kabiji twalomba milombelo yenu, pakuuba mba Lesa wa Mwiulu aketubile lusa kasa tuji kokwa kabiji ne kwitupa mpwijilo ikatampe.

Nayishiletu, keesha, nangwa bufuku bwapita, nangwa byonkabyo, kimye kyapwa. Kabiji jakeesha jajinga jimo ja . . . Kyawama, keeshaja japita, ne jakeesha, jajinga jimo jikatampe ja kalata-ichila ya mubumi bwami. Akwa, Nayukako pepi nobe bantu babiji, nangwa basatu, mu kishimikwa abo bajinga bakamonyi ba kwiya kwa Nkambo, ja keesha. Kabiji kintu kikatampe, kintu kyawama kyamwekele, akyo kyo Nabula kwikala na kimye lukeelo luno kya kwimubula. Bino kape pa Mulungu wiya lukeelo, kasa tukyangye kufumapo, kape Kekala na kimye, mu Mbila, kya—kya kwi mubuula. Inge Nkambo waswa, Amiwa nkatanwako, na kulombelela bakolwa, Pamulungu lukeelo. Twakonsha kukeba kufumapo pa kushikamana kwa juba, inge kyakonsheka, kuya ku mbung'eno ya ku San Jose mu San Jose, California. Kabiji inge muji na bantu baji kokwa, ku Kitulu kya Kumuzhika, abo, twaketekela, kikekala ke kimye kyo Napembelela, pa kimye kyabaya, lupipu lwa nyingijilo lubena kwiya. Kabiji kiji bingi pepi, Nalangulukile mba kyakonsha kumweka keesha. Kabiji Naketekela mba kyakonsha kwikala pa kyonka kino kimye, kabiji kikekala kyapitailla pa byonse byo twakonsha kumonapo nangwa kumvwa, nangwa byonkabyo. Bino, vulukai, akyo ABYO BYOBYAAMBA AYE NKAMBO. Mwamona? Kabiji nanchi atweba tubena kwikiketekelat, kimye kiji kyonse.

Kabiji tusakwikala na mbung'eno pa bibaza byawama. Naketekela mba abyoy byo, kechi byokiji nenyi, Gene? Pa bibaza byawama ku San Jose, California. Kabiji kikekala ke mpwijilo ya moba-teeni, kutatwila pa 20, kufika ne ku 29, ku—ku San Jose. Pano, anweba mwituvulukengapotu kabiji ne kwitulombelela.

Pano tuji pepi nobe, inge twalupukamo na kimye kyafwainwa, pepi nobe awala umo na afu, amba tusakutapa

pwijilo yetu ya kulombelela bakolwa ne kuleta Kyambo. Nasalulula, lukeelo luno, kibaaba kicheche kya Kinembelo, bifulo bibiji mu Baibolo, byakwambapo.

Bino kasa tukyangye kwamba, twayai tukunyike mitwe yetu pa kakimye kacheche, tulombe.

<sup>2</sup> Walusa lukatampe Lesa, twikepesha twaiya ku jitanda Jenu ja lusa lukeelo luno, nobe baana babula kufikilamo, pakuuba kwiya na lwitabilo lwabula kumvwanganamo kwi Lesa, alo lwapainwe kwi atweba ku Mupashi Wazhila, kabiji Kyeenyi Kyanji kiji ne atweba, kabiji kupichila mu mulaye wa Nkambo Yesu, amba inge twakonsha kwiya na kwikepesha kabiji ne kwipuzha kiji kyonse mu Jizhina Janji, twafwainwa kupewa bya kukabila byetu. Onkao mambo, atweba kechi tutala panyuma pa byakufikilamo byetu ne, mambo kechi tujipo na bimo ne, pakuuba tutala kunyuma kuji kufikilamo kwa ku Kalvali, ako bupe bwetu bwapewe kwi atweba kyatutu ku Mwaana wa kwa Lesa. Kabiji kechi twakonsha kubwezha mipolo yafwainwa kupita pa mashingo etu ne, byo tulanguluka pe atweba, bantu babula kufikilamo, kabiji ne kyokyo ku lusa Lwanji apa pa Kalvali Aye witubijile kyokyo atweba, pakuuba mba tulwetwe kwipi kwipi kwi Lesa, kwikala na bulongo. Kabiji pano atweba twi baana babalume ne babakazhi kwi Aye.

<sup>3</sup> Kabiji twaiya lukeelo luno, Nkambo, mushi ya mutenge mucheche, mu kwipana atweba bene, mu mwingilo, na kwisolola bubi bwetu, kabiji—kabiji ne mu bupopweshi bwa Bulesa. Twaketekela mba Anweba mukekala ne atweba kabiji ne kwitupa buyuke bwa bumupashi bwa kwiya Kweni kuji pepi, pakuuba mba tunengezhe michima yetu pajuba pajuba na mambo akyokya kintu kikatampe kyo twapembelela pa myaka masauzande. Kine bilengwa na lesa byonse bibena kubiza, ne kujila mba bikasululwe. Kabiji mipashi yetu iji mwi atweba, Nkambo, kimye kyonse ibena kwisolola, amba, “Atweba twi bakang’enda ne benyi, kabiji pano kechi po pa muzhi wetu ne, pakuuba atweba tubena kukeba Muzhi Awo Tungi ne Mulenga ye Lesa.” Tubena kupembelela kyokya kimye kikatampe kikeya.

<sup>4</sup> Nkambo, twatako michima amba iye mbung’eno, umvwe twabungakana kuno, twalombelela baana Benu bakolwa ne bamanyikwa. Kabiji twalomba mba Anweba musa kusambakana ne atweba leelo mujishinda ja pusanako, nakubuka misongo yonse ne bikola biji mukachi ketu. Kabiji kyakonsha kwikala, Nkambo, amba yuwe mulaye ye Nabaambengapo kimye kyapita, mu mbung’enno ne Anweba keesha japita, pakupita kimye kya mute, kabiji ne Anweba byo mwikishinikisha jikwabo ne jikwabo. Kabiji twalanguluka mba kimye kijitu pepi. Kabiji lekai jino jo juba, Nkambo, mo jafwainwa kumwekelamo, amba Anweba musakupipula nyingijilo, Nkambo, mu kintu kikekala kyawama bingi ku bantu Benu.

<sup>5</sup> Kabiji pano, Lesa Taata, kechi twalombelelatu bonka baji muno ne, pakuuba ku bonse baji bamwaya ntanda, abo bakabila, konse kumupashi kabiji ne ku mubiji. Panai kwi abo, Anweba Nkambo, byakukabila bya michima yabo, mambo baana Benu babena kulwisha mu ano moba. Kumanyikwa kufuma ku mulwanyi kwakonsa bingi, bino Anweba mwakila mu kukonsa. Mambo kyanembwa mba, “Mukatampe Aye uji mwi anweba kukila uji muntanda.” Mu kyonkakye mo twamwena lushijilo. Ambai kwi atweba kupichila mu Kyambo Kyenu kyanembwa. Kabiji byo tusakulupuka lukeelo luno, twakonsha kwamba nobe boba bailenga ku Emasa, “Bushe michima yetu kechi yajikutemanga byo Twajikwisambanga naji pakuya mu jishinda nenyi?” Twikipuzha mu Jizhina ja Yesu, Ao wapaine mulaye. Amena.

<sup>6</sup> Mbena kutanga kufuma pa bifulo bibiji mu Buuku wa Ntendekelo. Kimo kyatanwa mu kyapitala kyabu 24, kutatwila pa veeleshi wabu 56, kitangwa bibye.

*Kabiji aye wibambijile mba, kechi Mumbanjishe ne, aye Yehoba wi lushukisha kala lwendo lwami; ndekai Mbwele kwi nkambo yami.*

*Kumvwa abo bamwambijile mba, Tukimwite kamwale, tumwipuzhe tumvwe jwi janji.*

*Kabiji bamwichile Libeka, ne kwamba kwi aye mba, Waswa obewa kuya na yuwe muntu? Kabiji naye waambile mba, Amiwa nsakuya.*

*Kabiji bamwimenye Libeka kuya nab-...nyenga yabo, ne kalama wanyi wa mukazhi, kabiji ne kalume wakwa Abulahama, . . .*

*Kabiji bamupesheshe Rebekah, ne kumwambila mba, Obewa wi nyenga yetu, wikale inanja biumbi bya mamilyoni, kabiji ne ba mu kisemi kyobe bakashinda ne kwangata nsakwa ya balwanyi babo.*

<sup>7</sup> Kabiji mu Ntendekelo 22, veeleshi wabu 15, tutanga mba.

*Kabiji malaika wa YEHOBA wamwichile Abulahama jabubiji kufuma mwiulu,*

*Ne kwaamba mba, Nechipa Amiwa mwine, byo byaamba aye YEHOBA, byo wauba kino kintu, kya kubula kuka- . . .kukana kupana mwanobe, yenkawa umo ye uji nanji:*

*Kabiji mu kukupesha Amiwa kakupesha, ne kuvuzha Nkavuzha lukunwa obe nobe tubaangabanga twa . . .mwiulu, kabiji nobe musenga . . .kukitulu kya kukalunga; kabiji bamulukunwa obe bakangata mizhi ya balwanyi babo ke yabo;*

*Kabiji ba mu lukunwa obe mo mo bakamwena mapesho ba mu mikoka yonse ya panopantanda; mambo obewa wakokela jwi jami.*

<sup>8</sup> Pano lekai Nkambo abikepo mapesho Anji pa kutanga kwa Byambo Byanji. Pano Nakonsha kutemwa kusenda, inge kyakonsheka kutelwa mba kibaaba, mutwe wami lukeelo luno, patanshi, ke, “Kwesekwa mizhi yalailwe kasa ikyangye kutambulwa.” Kabiji mutwe wami ke: *Kwangata Nsakwa Yabalwany Babo ke Yabo.*

<sup>9</sup> Lesa waesekelenga mushakulu, mambo Aye wamupele mulaye. Kabiji umvwe Lesa walaya mulaye, Aye ukeba kushinikisha mba awe muntu waikala wafikilamo mu mulaye, Aye kasa akyangye kufikizha kyo Aambile ne nangwa kyokya kyo Alaile. Nanchi Abulahama bamulaile kuuba mba kupichila mu lukunwa wanji ntanda yonse ikapeshiwa, amba ukekala na mwaana. Kabiji, awe mwaana, mwi aye mwafwainwa kufuma Lukunwa ao wakonsha kupesha ntanda yonse. Kabiji Abulahama, mulaye byo apainwe kwi aye, wajinga na myaka sebeta-faivi; kabiji Sala, mukazhanji, wajinga na myaka sikisite-faivi. Pakuuba Baibolo wiitubuula mba Abulahama kechi wazhinakile mulaye wakwa Lesa, kupichila mu kubula lwitabilo ne, bino wajinga wakosa, kasa atakaika Lesa. Kabiji Lesa, pa kimye pa kimye, wamwesekelenga, pakuuba pano wafikile ku kokwa kwesekwa mapesho kasa akyangye kumweka ne.

<sup>10</sup> Kabiji abyo byokiji na Lukunwa yense wakwa Abulahama. Lesa witupa kokwa kwesekwa kwapelako Aye kasa akyangye kupana mulaye. Kabiji inge kya konsheka kubiwa, Amiwa nakonsha kutemwa kwambapo kintu kimo papo, amiwa mwine, bino Amiwa nsakufya kyokyo. Akwa kwesekwa kwapelako, ke kwakumona mowakosha kubila. Kabiji Aye byo apaine kwi Abulahama lulwe lweseko, Wamutaine Abulahama kwikala wakishika nobe byonka byo ajinga pa kuntendeka. Akonsha kwikala mapesho abaya bingi lukeelo luno inge atweba twatambula mulaye Wanji wa lubuko wakonsha kwikalatu wakine nobe byonka byotwaubile pa kwimana kuno ne kwikiswa. Nangwatu dokotala ambe ka, imanatu kyakine.

<sup>11</sup> Kabiji byo aubile bibye, ne kukanya mwananji yenka umo ne, pakuuba wajingatu pepi na kwasamo mupenyi munda mwakwa Izaka, na konauna lushimuno lwanji. Aye wapaine lushimuno, pa ntanda yonse yo ayukile, amba ukekala na yuwe mwaana. Kabiji pano mwaana byo aishile, waipuzhiwe kubwela lunyuma, kabiji ne koonana lonka luketekelo lo ajinga nalo pakuuba mba lushimuno lufikizhiwe. Kabiji Lesa byo amwene mba wajinga walukokelo ku lolwa lwitabilo lo ajinga nalo mwi Lesa, Lesa watajile kufuma mwiulu kabiji Waambile mba, “Amiwa nechipa Amiwamwine amba Amiwa kakupesha ne kukuvuzha, kabiji

lukunwa obe ukangata mizhi ya balwany babo ke yabo.” Mulaye wamusango ka!

<sup>12</sup> Kabiji Libeka, awo wafwaijilwe kwikala inanja yuwe watongolwa, walailwa, mwaana wapembelejilwenga, byo aichilwe ku lweseko lwapelako, lwa mwanamulume mwenyi awo ye akyangye kumonapo kala, kanatu wamwene kwingila kwa Mupashi Wazhila. Kabiji bainanji kasa bakyangye kufukula kana wakonsha kuya na yuwe mwenyi nangwa ne, kwikala mukazhi wa mwanamulume ye akyangye kumonapo, aye waletelwe ku kwesekwa kwapelako. “Tusakumwita inetu mwine eambile. Tusakumvwa pakanwa kanji kana wakonsha kuya, ee nangwa ine.”

<sup>13</sup> Abyo byobyoyo kyaletwa ku Lukunwa yense wakwa Lesa. Kyafwainwa kwikala pa kanwa kobe. Lesa ukeba kumvwa kufuma kwi obewa.

<sup>14</sup> Nanchi byo abikilwe pa kwesekwa, aye kechi wapembejile nangwa pa mineti umo ne. Waambile mba, “Amiwa nsakuya.” Natemwa kyokyo. Kechi mba, “Lekai kilangulukepo. Lekai kifunde kyokyo.” Aye washinijilwe mu muchima wanji. Abo bo bantu Lesa bo akonsha kwingijisha, umvwe obewa mwashininwa mba Lesa usakulama mulaye Wanji. Waambile mba, “Amiwa nsakuya.”

<sup>15</sup> Kabiji bantu banji mu kyokya kimye, bajinga bashingwa bingi manyi, kapepo kechi bekiyukile ne, bino ba awile byo batetekele maboko abo pa nyenga yabo, ne mwanabo wamukazhi; awe walamba, nsongwakazhi mwanjike wa Kiyudeya, byo bamubikilenga pa ngamela ne kumutuma ku ntanda ya bwenyi, mukachi ka bantu benyi. Bino kwajinga Kintu kimo pe abo. Baambile mba, “Lekai lukunwa obe akangate nsakwa ya balwany baabo. Obewa ikala inanja biumbi bya mamilyoni.”

<sup>16</sup> Kabiji, leelo, awa mutundu wa bantu ne bantu bakwa Lesa bakumbana kufuma ku kalunga ne kuya ku kalunga, mwaya ntanda. Mu lusanguko bakekala nobe tubaangabanga twa Mwiulu, abya byeya byatoka bitola bifulo byabo, byo bipita mwiulu. Kabiji umvwe byaiya, bikekala nobe tulunga tuji ku . . . nangwa musenga uji ku kitulu kya kalunga. Bakekalako masauzande a mamilyoni.

<sup>17</sup> “Lunkunwa obe ukangata nsakwa ya balwany banji.” Ao ke mulaye waluchipo wakwa Lesa, “Awa lukunwa wakwa Abulahama.”

Nanchi, monka mu Mupashi Wanji Wazhila, byo amwene mba bainanji bakekala ku lubaji lwa mwaana, ne abo, mambo ke lubaji lwa ku mubiji. Nanchi, Mupashi Wazhila kwingila mu babo bantu, waambile mba, “Aye. . . Lekai Lukunwa obe akangate nsakwa ya balwany banji.” Nanchi, Lesa pa kuchipa

Aye ukangata nsakwa ya balwanyi banji, nanchi ng'anyi kifulo pabikwa Kipwilo kya Lesa mumi?

<sup>18</sup> Atweba twi Lukunwa wakwa Abulahama. Mambo, atweba, twafwa mwi Kilishitu, tuji na, twasenda Lukunwa wa kwa Abulahama kabiji twi baswanyi pamo ne aye, mu luchipo lumo. Atweba twi Lukunwa wakwa Abulahama, kabiji twibaswanyi ba mulaye wapainwe kwi aye. Pakuuba umvwe kwesekwa kwafika, apo ipo po tukakalwa. Bino Amiwa kechi naketekela mba Lukunwa wakine wakwa Abulahama ukakalwa ne. Bakemanatu bakonsa kabiji balukokelo nobe byajinga Abulahama.

<sup>19</sup> Pano twamona mba Lesa kechi wakonsha kwamba kiji kyonse nangwa—nangwa kulaya mulaye uji yense ne kanatu Aye wa mufikizha. Aye wakonsha kuuba kyokyo pakuuba mba ekale Lesa. Myaka palutwe, abo bantu bamo, bantu balailwe, lukunwa wa kwa Abulahama wajinga mulwendo, kuya mu—mu ntanda ya mulaye, kwajinga nsakwa yaimene, kabiji ya mwimejile aye, kabiji wajinga mulongo wanji mwine, Moabu, waambile mba, “Obewa kechi ukakilang'anya ntanda yami ne. Amiwa nsakumona kuuba mba kechi mukakilang'anya mu ntanda yami ne.”

<sup>20</sup> Aye waambile mba, “Inge bang'ombe betu banja nsono yenu iji yonse nangwa inge batoma meema enu, tukemulipila pakyokyo.”

Bino aye waambile mba, “Anweba kechi mukakilang'anya ino ntanda ne.”

<sup>21</sup> Bino mulaye wakwa Lesa wajinga wakine. Nanchi baile na kusenda ngauzhi wabo, Balamu, ne kumuketa amba afinge bantu. Kabiji bino byo aambile. Baesekelenga ku mumweshela lubaji lwatama lwa lukunwa wapeshiwa, pakuuba Lesa wamumwesheshe lubaji lwanji lwakila mu kuwama. Aye waambile mba, “Yense ukafinga Isalela ukekala wafingwa mafingo, kabiji yense ukamupesha ukapeshiwa.” Kabiji byamba byonse byaikajile panshi ne Isalela waabukile misaza. Lesa walaile mba ukangata nsakwa ya balwanyi banji.

<sup>22</sup> Palutwe, mu myaka, kwayishile umo wajizhina ja Danyela, ao wajinga mu ndonda ya yuwe Lukunwa Wazhila, kabiji mu ndonda ya milaye, mambo aye wajinga Lukunwa wakwa Abulahama. Kabiji Lesa wamusalulwile aye kintendekesho kya ino ntanda kasa kikyanyge kwaalwa, kwikala ngauzhi Wanji, kabiji waikele wakonsa kabiji waikele walukokelo. Kabiji ne muntanda ya bwenyi, wafukwijile jimo mu muchima wanji mba, “Amiwa kechi kezhilulula nabo amiwa mwine ne.” Awa ye Lukunwa wakine wakwa Abulahama; kwikala muntanda yapusanako, kwikala mukachi ka bantu bapusanako, bino nangwa byonkabyo kasa bakonsa ku yewa mulaye. “Amiwa kechi kezhilulula nabo amiwa mwine ne. Amiwa kekala wa kine.”

23 Lesa wamubikile pa lweseko nobe Aye byo aubile kwi bashanji, Abulahama. Kabiji mfumu waambile mba, “Anweba mukekala nobe umo wa mwiatweba kabiji ne kupopwela mujishinda jo tupopwelamo, inge ne Amiwa kemutaya mu jiyengo ja yulamo mabokwe baji nazala.”

24 Danyela, nobe Abulahama shanji, waambile mba, “Anweba mwakonsha nkutaya mu jiyengo ja mabokwe, bino Amiwa kechi kafukamina tulubi twenu ne. Amiwa kechi katola bupopweshi bwenu bwakokelela ne. Amiwa kekala wakishika kwi Yehoba.”

25 Kabiji kwaishile kubekya pokaapa. Aye mfumu walamine mulaye wanji kabiji watolele ngauzhi, nangwa wamutwajile ne kumutaya mu jiyengo ja mabokwe. Kabiji umvwe mabokwe, balwanyi bakwa Danyela, banyemejileko ku ngauzhi, Lesa walamine mulaye Wanji. Aye waangachile nsakwa ya balwanyi banji ke yanji. Lesa waimikile Malaika kulutwe ya booba mabokwe, kabiji waangichile nsakwa. Lesa ulama mulaye Wanji. “Ukangata nsakwa ya balwanyi banji ke yanji.” Lesa ye wikyambile.

26 Kabiji kwajinga basatu bakwabo kokwa bafuukwile kukokela mutanchi waitabilwa, abo bajinga Lukunwa wa kwa Abulahama wabukine, kabiji aba bajinga Shandalaka ne Misheki ne Ambendenengo, kabiji babikilwe mu lweseko. Kabiji baambile mba, “Inge wabula kufukama pakumvwa kwimba kwa-byansa ne kuvuma kwa-mamtolipita, inge wabula kufukamina bupopweshi bwetu, kabiji ne kufuma ku bintu byo—byo mwaketekelamo! Kabiji anweba bonse mwazoba, nangwa byonkabyo. Bupopweshi bwenu kechi bwakilapo bwabakwenu bonse ne.” Bushe kechi tumvwa byobyo kimye kyonse nenyi? Pakuuba bu—bupopweshi bwa Yesu Kilishitu bwapusanako. Bulume bwa lusanguko Bwanji bwapusanako. Atweba twi bantu bapusanako, bantu bapusanako, bung’anga bwa bufumu. Lesa uba byapusanako.

27 Bino byo baambile mba, “Obewa wafwainwa kwikala umo wa mwi atweba.” Kyafwaijilwe kwikalatu bulongo kwi Shandiliki ne Misheki ne Ambendenengo inge bakebelenga kwikala umo wa mwi abo, bino kechi bwafwaijilwe kwikala umo wa booba benyi ne. Bino, baambile mba, “Inge kechi mwikyuba ne, tuji na kizhilo kuno kyakuya ku kisha kya mujilo, kyakuuba mba twakonsha kwikinshikula ne kukutayamo obewa, kabiji wakonsha kulanguluka mba nachi inge najinga umo wa mwi abo.”

28 Abo bavulukile mulaye. Bebatwajile ku kisha kya mujilo. Kabiji byo banshikwile kibelo ne kwibataya mu mujilo, mulwanyi wabo wa kwibonauna, baangachile nsakwa ya balwanyi baabo ke yabo. Lesa watumine Mwaana Wanji monka mu mujilo ne kutalazha lubeebe, kabiji wisambilenga nabo kimye kyo bajinga momwa. Mulaye wakwa Lesa waikele wa

kine. Baangachile nsakwa ya balwanyi ke yabo. Baesekelwe patanshi, apa bino po baangachile nsakwa ya balwanyi ke yabo.

Bushe kechi Yesu Ye walaile nenyi? “Inge waleta kyakwitutulako ku umo wa baabo baana babacheche, kyakuwamina obewa bakukashila jibwe pashingo yobe ne kukutaya pa kalunga kazhika. Kechi wafwainwa ne kuleta luzhachisho kubaabo bacheche baitabila mwi Amiwa ne. Kabiji abye biyukilo bikebalondelanga baitabila mwi Amiwa.”

<sup>29</sup> Aye wamwesheshe lupusano. Aye wamwesheshe booba baitabila ne booba babula kwitabila.

Kuji, kimye kyonse, kuji mabumba asatu a bantu, abo ke: wabula kwitabila, ne kitabila-mbijinga, kabiji ne waitabila. Bino Lesa uji najishinda ja kushiniikisha amba waitabila nyi. Awa waitabila wimanatu pakonsa pa byaamba Lesa amba bo Bukine. Ee.

<sup>30</sup> Wajinga Elaija, mwina Tishibe, byo kyafikile pa kwikyombesha, poso walangulukile mba aye ujimotu bunke mu kyaalo wajinga na Lesa. Kabiji mfumu wailenga na kumubika mu lweseko. Kabiji ba mumanyikile. Kabiji awa mucheche mubiji, inamfumu wapeta-kilungi, wa jizhina ja Yezebeli, wanchinyishe bumi bwanji. Kabiji byo kyafikile pa kimye kya kubekya, Elaija washijile nsakwa ya balwanyi banji kabiji waalulwijile kyaalo kyonse kwi Lesa jibiji. Lesa ulama mulaye Wanji.

<sup>31</sup> Kyajinga Mosesa, panyuma yakwikala mu ndonda ya yuwe Lukunwa wa bufumu, awa Lukunwa wakwa Abulahama, amba byo atuminwe mu Ijipita, na kupokolola baana ba Isalela; kabiji Lesa wamupele biyukilo ne bya kukumya byakwingijisha, kabiji ne kupuma pantanda, kabiji ne kuleta babombwe, ne mbalebale, ne fishi, kabiji ne kikukwila, ne mvula, kabiji ne mujilo, kabiji waubile byonse bye byakukumya. Nangwa byonkabyo, byo ebatangijilenga kulupuka na kuboko kwa Yehoba, kwaishile kimye kyo akumenye nsakwa pakachi kanji ne ntanda ya mulaye. Kwajinga Kalunga Kachila, kakilang’anya mujishinda jobo. Abo bajinga na moyo na mazhita akwa Felo, mitumba, ne biselebwa, kabiji ne Kalunga Kachila. Bino Mosesa waile kulutwe kabiji waangachile nsakwa ya balwanyi banji, kabiji waabukile pa Kalunga Kachila, pa mushiji wauma, kimye kyo aendelenga pa mukwakwa wa lukungu. “Aye ukangata nsakwa ya balwanyi.” Lesa ye wikyambile, kabiji akyo kyaikajika bintu byonse.

<sup>32</sup> Bajingatu na myaka icheche palutwe pa kimye kyaishile meseko, kabiji kipwilo kyakuminye bingi, byonka byokikala kyapeela bingi kipwilo kya bantu kwikyuba inge kintu kimo kyabula kumweka mu musango mo kyafwainwa kubula kwikela. Lesa wikilenga muyewa musango. Lesa uleta byakwipachika mu kipwilo, “Mwaana yense wiya kwi Lesa wafwainwa kwesekwa, kabiji kushinikishiwa, kabiji ne kwesekwa.” Aye uleka misongo



yakwata pe obewa. Aye uleka bikola kufika pe obewa, mu kuukweseka ne kukushinikisha obe, mu kumwesha ntanda amba kine yobe Lukunwa wa Abulahama. Aye wikiswisha kupichila mu kyaswa muchima Wanji Mwine. Aye uswisha byamalwa. Aye uswisha balunda kukwalukilamo. Ae uswisha byonse bye bintu, ne kuswisha diabola, ku kweseka obewa. Kabiji aye ukoba bintu byonse kanatu kusenda bumi boobe. Wakonsha kukutaya pa mwanya wamakatazho. Aye wakonsha kulengela bena kikalakulo bakwiimena. Aye wakonsha kulengela kipwilo kya kwiimena. Aye wakonsha kuuba kintu kiji kyonse, kabiji ke kyaswa muchima wakwa Lesa amba ekyube. Twafunjishiwa mba kyawama kukila pa golonde, kwi atweba.

<sup>33</sup> Pano nga Abulahama ne Izaka, ku mutumba, ku yewa kwapainwe mulaye? Kabiji n mambo alukokelo lwanji ne kuyuka kwanji, kabiji ne lwitabila lwanji mwi Yehoba, kupichila mu kyokyo, kabiji kyonka kyootu, kyakuuba mba Lesa watajile panshi ne kwamba mba, “Lukunwa Wanji ukangata ma nsakwa. Amiwa nechipa Amiwa mwine amba Nkooba bibye bintu.” Kechi kwajingapo umo wabaya Ye akonsha kuchipilamo ne, bino Aye wichipile Ayemwine.

Nanchi, inge Aye walekele Abulahama kwesekwa kufika pakyokya kipimo kyapelako, Aye wakonsha kukweseka obewa ne amiwa kufika pakyokya kipimo kyapelako, kimye kyakufuukula inge bintu byonse byafuma kwi obewa. Obewa wafwainwa kwimana bunke popa. Aleluya! Abyo byokiji.

<sup>34</sup> Imanatu pa bunke. Lupuka popa ne kwaamba mba, “Nangwa Aye wangipaya, neapo Amiwa kamuketekela Aye.” Awa ye Lukunwa wakwa Abulahama. Awa ye Iye wapanwako mulaye. “Kechi mambo ne nangwa bashala baamba mba, bashala bekyuba; pakuuba amiwa ne ba mu nzubo yami, tu kamwingijilanga Lesa.” Waambile mba, “Inge bonse bashala baamba mba, ‘Kechi kujipo kintu kimo kya kupitamo ne. Ke jibumba ja kisangajimbwe; kwi amiwa ne nzubo yami, tukamwingijila Lesa.”

Kabiji Natemwa kwamba nobe Paulo ponkapo, ne kwamba mba, “Mujishinda jo batela mba ‘myendeleko’ nanchi byopopwela Amiwa ne Lesa wa bashakulu betu.”

“Nangwa bekale bakajimbulushi baiya mu kipwilo, nangwa bekale bakwalula bintu, kabiji nangwa bekale ba misango yonse ya bangauzhi babubela kabiji ne bintu byonse byaiya mu kipwilo mukachi ka bantu, kabiji ne mu kikalakulo; pakuuba amiwa ne ba mu nzubo yami, tukamwingijila Nkambo. Nangwa bonse baleka kwiya, kabiji nangwa kipwilo kyaikala kya munyango, kyapusanako, amiwa ne ba munzubo yami, tukamwingijilanga Nkambo. Nangwatu muntu walombelejilwe kabiji wabula kukonsa; akyo kechi kijipo na kintu kimo kyakuba

nakyo ne; mambo ami ne ba mu nzubo yami, twingijila Nkambo.” Kwesekwa ne meseko.

<sup>35</sup> Bantu kechi baikala babula kulenga mambo ne, pakuuba Lesa byo anji. Muntu, mwabika maana enu pa muntu, ukoba kilubo. Kapapo kechi kubilamotu ne, bino aye wakonsha kwikyuba. Lesa umuswisha mba ekyube pakuuba mba Aye asukanye lwitabilo lweni lufume ku muntu. Lwitabilo lwetu kechi luji mu maana a muntu ne, kana mu bulume bwa lusanguko lwa Yesu Kilishitu. Amo imo Lukunwa wakine wakwa Abulahama mo mwakokolokela mulaye wabo. Mambo, bakonsha kwikalatu Lukunwa wakwa Abulahama umvwe batambula Mupashi Wazhila. Kwakubula Mupashi Wazhila ne kechi ke Lukunwa wakwa Abulahama ne. Alwa lwitabilo lumotu lwajinga mwi Abulahama lwiya mu waitabila. Nangwa kyamusangoka kyubiwe nangwa kikale kyapusana, waitabila utwajijilatu na kuya.

<sup>36</sup> Bakwendela ntanda babwelele ne kwamba mba, “Oo, ke—ke bumbulwa maana kwikyeseka. Kechi kujipo kine kintu kyakuya kulutwe ne, mambo booba bantu ke bazama. Kabiji baji na tufulumende twabaya bingi, kabiji abo—abo baji na mafumo, kabiji, kika, atweba twamwekelenga nobe batete pakwimana kulubaji lwabo.”

<sup>37</sup> Amiwa kechi nayuka ne, bino Naketekela papo mba Yoshiwa wajingatu muntu mucheche, wajingatu mucheche, mulongo wanyana. Nakonsha ku mumona aye kasa abena kutoloka, pa—pa kintu kiji nobe kibokoshi, kabiji waambile mba, “Balongo ne batemwe,” ku bantu baji pepi nobe tuu milyoni, “atweba twakonsha kwikitambula.” Mwamona? Kika? Kwajinga Lukunwa wakwa Abulahama. Lesa wapaine mulaye. Abwa bwajinga ke bunoshi bwabo. Lesa wapaine mulaye. Kechi oene mambo ne nangwa kwikale byepi, Lukunwa wakine wakwa Abulahama waambile mba, “Twakonsha kwikitambula mambo Lesa wikipaine kwi atweba.”

<sup>38</sup> Apo po waimana lukeelo luno. Apo po paimana Kipwilo kya Lesa mumi. Amiwa kechi natako muchima nangwa muntu mukwabo ambe mba, kyaamba dokotala, kintu kiji kyonse, kyaamba wabula lwitabilo, atweba twakilamo kwikala kushinda kiji kyonse kiiya kulutwe. Atweba twi Lukunwa wakwa Abulahama, kabiji tukangata nsakwa ya balwanyi betu, nangwatu mulwanyi ekale wamusango ka. Lesa wapaine mulaye. Awa wajinga wabo, ke bunoshi bwabo.

<sup>39</sup> Lubuko ke bunoshi bwenu. Lupulukilo ke bunoshi bwenu. Aye Mupashi Wazhila ke bunoshi bwenu. Kabiji kuji bakatampe, masauzande a basapwishi ne bikwabotu mu ntanda leelo, bamba mba, “Akyo kechi byo kiji ne.” Pakuuba Lukunwa wa kwa Abulahama wayuka mba byokiji. Abo baya monka nakutambula nsakwa ya balwanyi baabo. Lesa waambile mba byobakooba.

Abo bekiketekela mambo ke mulaye. “Wanji Lukunwa ukangata nsakwa ya balwanyani.” Pano anweba mukapita mu meseko, ne bya kwesekwa.

<sup>40</sup> Kabiji Yoshua waimene popa, wakishika. Mulunda muheche waambile mba, “Amiwa kechi natako muchima ne nangwatu bekale babaya byepi. Amiwa kechi natako muchima nangwa bekale na jifumo ja musango ka, ne mizhi yabo iji na masakwa alepa, kabiji byabaya musango ka. Mulaye wetu ke, wakwamba mba, ‘Nsakwa ikangatwa na Lukunwa wa baana bwakwa Lesa,’ kabiji tubena kuyako na kwiitambula. Twibakila mu kushinda.” Oo, awa ye Lukunwa wa kine.

<sup>41</sup> Bavula ba mwi abo basemekelwe, lukunwa wa kumubiji, baambile mba, “Atweba kechi twakonsha kwikyuba ne. Kechi kuji ne kweseka ne. Monai, betekila mu kuvula. Atweba betekila mukuyuka; atweba tuji bintu byonse.” Nangwatu, aye kechi wakonsha ne . . . Abo batajilengatu pa . . . jiso byo jamwene. Kabiji Yoshiwa wamwenenga pa byaambile Lesa.

<sup>42</sup> Awa Lukunwa wakwa Abulahama kechi utala pa bintu bya ku mubiji ne. Abo batalatu ku byaamba Nkambo. Ao ye mulaye. Pano ibyepi Abulahama inge watajile ku mubiji? Pa mwanamukazhi uji na myaka aduleendi. . . Naite, aye byo ajinga. Kabiji aye wajinga aduleendi. Kabiji waikela nanji kufuma kimye kyo ajinga nsongwakazhi muheche, kabiji aye wajinga nsongwalume muheche, kabiji kechi wajinga na lukunwa ne. Aye kechi watajilenga ku byo byo bintu ne. Aye wabajilenga byo byo bintu nobe kechi byajingako ne, mambo aye watajilengatu ku byaamba Lesa. “Amiwa nkakupesha, Abulahama, kabiji Amiwa nkakupa lukunwa mwi Sala.” Kabiji aye wikiketekiye. Obewa kechi wafwainwa kutala ku byo bya bikanya kuuba ne. Tutala pa byaambile Lesa. Lesa wiyambile, akyo kypawisha byonsetu.

<sup>43</sup> Nanchi pano byo aishile ku Yodano, kimye Yoshiwa kyo alengelwe mukulumpe-mwine-mukatampe wa mazhita, kabiji bafikile kukitulu kya meema kabiji batajilenga bushiyya ne kumona Yeliko. Bino, pakachi kaabo, Yoshiwa mazhita anji ajinga anengezhiwa jimo, apa pajinga nsakwa. Nsakwa yatelelwe mba Yodano.

Pakuuba mulaye wakwa Lesa wawamatu pa nsakwa iji yonse. Nangwatu ikale nsakwa ya byepi, mulaye wakwa Lesa wawama. “Aye ukangata nsakwa ya balwanyani banji.” Akyo kyaikajika byonse.

Byo afikile ku Yodano alwa lukeelo, kapepo, Amiwa naketekela mba diabola wajinga na makumbi akikukwila ankobama konse konse, meema akatampe akala a mateshi-aishilenga nkobaji, majimi asendelwe na mukwe wa muyulo. Oo, kyajinga kimye kyalweseko kyabaya! Pakuuba Yoshua waambile mba, “Inengezhi, anweba mukamona lukumo lwa

Lesa.” Kabiji bezhijikile abo beene ne kwinegeza, akwe bintu byonse byamwekelenga kwikala byapusanako. Bino awa wajinga Lukunwa wakwa Abulahama, ao Lesa ye achipile mba, “Nkamupa nsakwa.” Aye wafikile ku Yodano, aya yajinga nsakwa yanji, kabiji wiitambwile ke yanji.

<sup>44</sup> Kabiji lukeelo lumo Amiwa kafika kuyoya nsakwa yapelako ne ayo. Obewa wafwainwa kufika ku Yodano, pakuuba Lukunwa wakwa Abulahama ukangata nsakwa. Nangwatu kikale kika, ukangata nsakwa ya mulwanyi uji yense.

<sup>45</sup> Bonseba banabalume bajinga bantu bakatampe. Bafwijiletu mu mulaini. Bino, pa kupezhako, juba jimo mu Betelema wa mu Yudeya, Lukunwa Wazhila wasemekelwe. Ao, bonse bashala bajingatu bivule. Awa Lukunwa Wazhila wasemekelwe, kechi ku muntu ne. Bino Aye wasemekelwe na kisungu, na bulume mu mishipeshipe Yanji, na kushinda lufu ne kalunga kabafu. Lesa wapaine mulaye. Muntutu kechi wakonsha kwikyuba ne. Bino umvwe Lesa walaya mulaye, Aye ye Lesa umotu yenka Wajingako mamineti acheche kunyuma, ne Abulahama, Yehoba-yeumwena, aye Yehoba ye ukemumwena jishinda ja kutambwilamo nsakwa. Tusa kwikyuba byepi? Yoshua wafwile. Mosesa wafwile. Bashala bamwiabo bafwile. Bino Lesa waambile mba, “Ukatambula nsakwa ya balwanyi banji.” Ukatambula byepi lufu? Aye uji na jishinda ja kuubilamo bintu. “Aye ukangata nsakwa ya balwanyi banji.”

<sup>46</sup> Awa Lukunwa wa Bufumu wasemekelwe. Aye waesekelwe mu misango iji yonse nobe byonka byo tuji. Byonka byo wafwainwa kwesekwa, nanchi byo byajinga ne Aye. Aye diabola bukiji bukiji wamusendele Aye, kimye Aye kyo atambwile Mupashi Wazhila, wayile mungye pa mooba foote ne mafuku, na kwesekwa. Kabiji byo Alupukilemo . . . Kabiji pa lufu Lwanji, ba mupopele misumali mu maboko Anji, kabiji ne kushipila mu kilungi Kyanji. Aye wapichile mumisango yonse. Bino byo Ajinga pano pantanda, Aye washinikishe mba Wakonsha kushinda misongo. Kimye bainanji byavyala bakwa Petelo byo bakolelwe, na mashika, Aye wakwachile mu kuboko kwanji kabiji ne mashika apwile. Kabiji wa mbumba byo abijikile pa kibelo, “Wandochi! Wandochi! Inge Anweba mwakonsha, Mwakonsha kundenga amiwa kwikala mututulu.”

<sup>47</sup> Aye waambile mba, “Amiwa nsakuuba. Ikala mututulu.” Aye washijile ne kwangata nsakwa ya mbumba. Aye waangachile nsakwa ya mashika.

Aye walengele kyonse kilengwa na lesa kumukokela Aye. Aye wajinga Lukunwa wakwa Abulahama, awa Lukunwa Wabufumu, Umo konka kwapainwe mulaye; kwi Aye, Abulahama ne Lukunwa yense wa mulondejilenga, kufika ne ku Lukunwa Wabufumu, kabiji ne Lukunwa yense Wamulondejile. Lesa mulaye wanji wa kine. Aye washijile misongo.

Aye washijile lweseko. Kimye mulwanyi kyo ashijile mu kilungi Kyanji, wapuminwe ku mubanga Wanji, Aye waalukijile kulubaji lukwabo. Kimye kyo bamundosele myevu kufuma mu kilungi Kyanji ne kumushipila mate, Aye kechi wabwezhezhe jibiji ne. Aye washijile nsakwa ya lweseko kabiji ne kwiyangata.

<sup>48</sup> Nanchi waamba mba, “Kuzhingila kwami kechi ukaswisha amiwa kwikyuba ne.” Anweba, Lukunwa wakwa Abulahama, ee, mwane, Aye wimunshijileye.

<sup>49</sup> Kimye kyo atukilwe, Aye kechi wabwezhezhe ne. Kimye kyo bamuletejile bisela, Aye Wazhindaminetu. Kimye kyo Bamwichile mba diabola, Aye Wazhindaminetu. Aye wajinga namwingilo umo, kabiji ao ke mwingilo wa ba Shanji, kabiji Aye wapitang'enenga na kumwingila. Pano, kyapelako, Aye bamutwajile ku musalabu. Lufu lwa mu Kumenye. Bonse bashala bashijile tulunga, kabiji bashijile bilengwa na lesa, kabiji bashijile babokwe, kabiji bashijile mujilo. Bshijile byonse kanatu lufu. Bino uno wajinga Iye, wampuminenga mishipeshipe Yanji, monka mwa, na kushinda bulume bwa lufu. Nanchi batolele mabokon Anji ne Kwiatanyika kabiji bamupopele Aye pa musalabu. Bamupumine Aye kabiji bamuvujile Aye poso bikupa Byanji byatatwile kumutala Aye. Bino byo baubile byo byo, kabiji baubile byonse byo baubilenga, lufu lwa Mufikijile, lwaambile mba, “Pano Amiwa nsakukusenda Obewa nobe byonka byo Naubile Yoshiwa. Amiwa nsakukusenda Obewa nobe byonka byo Naubile Danyela. Kabiji Amiwa nsakuba byonse bye, mambo Amiwa nsakukulenga Obewa kufwa.”

<sup>50</sup> Kabiji Aye wafwile poso juba jiuvwijile buvu ajo jine. Aye wafwile poso bilengwa na lesa biuvwijile buvu kabiji byakakelwe ne kwingila. Juba jazhikile pakachi ka mute. Tubaangabanga kechi twalupukile ne. Aye wafwile posotu bintu byajinga byafita bingi kechi wakonsha kumona kuboko kobe ne, pakachi ka juba. Nakonsha kulanguluka bilengwa na lesa byaambile mba, “Lekai mfwe Nanji.”

<sup>51</sup> Mulongo! Nanchi diabola watumine mweo Wanji wawama kuya mu kalunga ka bafu. Akwa nsakwa yashikukile, bino Aye walupukilemo pa juba jabusatu, wiyishijile. Amena. “Lukunwa Wanji ukangata nsakwa ya balwanyi.” Washijile lufu! Aye washijile kalunga ka bafu. Pa lolwa lukeelo lutanshi lwa Lusanguko, Aye washijile kilende. Pano twaimana, bakila mu kushinda, monka mwi Aye Witutemenwe.

<sup>52</sup> Pa Juba ja Pentekositi Aye watumine Mupashi Wazhila, na kutwajijila, kupita mu Bangetila, na kufumyamo Lukunwa wa mulaye. Nakupana ku Bangetila, bajinga-kwalepa, na kwibapa lubatizhilo lwa Mupashi Wazhila, pakuuba mba baletwe mu Mulaye. Pano tuji na luusa lwakushinda misongo yonse. Atweba kechi twafwainwa kwiwishinda ne;

yashindwa kala. Twafwainwatu kwamba mba mulaye wetu kabiji twamutambula. Washindwa kala. Lufu lwashindwa. Kalunga kabafu kashindwa. Misongo yashindwa. Kwesekwa kwashindwa. Bonse bademona bashindwa. Kalunga kabafu kashindwa. Lufu lwashinda. Kilende kyashindwa. Twaimana mu nsakwa, na kwiisenda, kwakubula ne kuloza buta. Kyalipilwa kala.

<sup>53</sup> Mulwanyi wanji, ukangata nsakwa ya balwanyi banji. Baanga? Biumbi bya mamilyoni; aye ukangata nsakwa ya balwanyi banji, mulwanyi yense. Aye wabukile kubafwa. Twiyitambula ke yentu mambo Aye witupeleyo. Ke kya bupetu kyonse, kufumyako byobyo, kabiji ne bintu byonse byo Aubile, kabiji washijile nsakwa yonse. Aye washijile misongo, watolele nsakwa. Kintutu kyo twafwainwa kuuba ke kwenda kuya ku kibelo kyansakwa, ne kwamba mba, “Mu Jizhina ja Yesu Kilishitu, aye Kashinde!” Amena.

<sup>54</sup> Kimye byo kyafikile kyakufwa, lufu lwaambile mba, “Talai na mulenge asende bupopweshi bwanji.”

<sup>55</sup> “Mu Jizhina ja Yesu Kilishitu wa ku Nazala, bwela panyuma, Yondano!” Aye Lukunwa wakwa Abulahama wasenda nsakwa.

<sup>56</sup> Kika, Paulo waambile, byo bakebelenga kumuchibako mutwe wanji, Lukunwa wakwa Abulahama, waambile mba, “Lufu, lumuna obe ujipi? Kilende, lushijilo lobe lujipi? Sante ekale kwi Lesa Ao witupa lushijilo kupichila mwi Yesu Kilishitu.”

<sup>57</sup> Aye ukangata nsakwa ya balwanyi banji, yangate. Pano, aye kechi washindwa pa nsakwa ne. Aye ukeyishinda ne kwiitambula. Aye ukeyangata. Akyo kiji monka mu bulume bwanji.

<sup>58</sup> Mu Kipwilo kya Lesa mumi, lukeelo luno, muji bulume bwa kubuka bikola byonse. Mu Kipwilo kya Lesa mumi muji bulume bwakushinda kwesekwa konse. Mu bunoshi bwa Kipwilo kya Les mumi, lukeelo luno, mujin bulume bwakukasa bubu ne kwibutaya kwalepa, kabiji ne kutambula lubatizhilo lwa Mupashi Wazhila, mu Kipwilo kya Yesu Kilishitu.

“Kyonse kyo mukeba, lombai mu Jizhina Jami, kabiji kikemupewa. Mukakimye kacheche, kabiji bamuntanda (babula-Lukunwa, lukunwa wabulwa kusangululwa) kechi Bakamona jibiji ne. Nangwa byonkabyo anweba Mukamona, mambo Amiwa kekala ne anweba, monka mukachi kenu, kufika ne ku mpelo ya ntanda.” Kika? Aye Lukunwa Wabufumu. “Mingilo yonguba Amiwa, ne anweba mukeyuba. Amiwa nesolola Amiwa mwine namba Nji nenu, mambo bibye biyukilo bikebalondelanga baitabila.”

Aye ukangata lukunwa wa balwanyi banji. Aye ukeyangata. Lukunwa Wanji ukangata nsakwa ya balwanyi banji, nangwatu ikale nsakwa ya byepi. Inge misongo, meseko, bubu, musango

yense wa nsakwa, washindwa. Kabiji Lukunwa wakwa Abulahama wiyangata.

<sup>59</sup> Bushe anweba kechi mwasekela ne, lukeelo luno, pa kuyuka mba twaimana bakila kushinda? Twakila mukushinda! Oo, kechi kujipo kyakulwila ne. Nkondo yapwa. Wiso wavuma kala. Mbandela yasutulwa kala. Kabiji ka bubi buji bonse, mukachi ka lumu yense wamisongo, ke musalabu wakala wakosakana, wa byajilwe na Mashi akwa Yesu Kilishitu, Kashinde. Kintutu kyo twafwainwa kuuba ke kuketeketelatu, kutala ne kwikala na bumi.

“Amiwa kekala nenu. Amiwa nsakushiniikisha. Bantu bakeya mu moba akupelako, ne kwamba mba, ‘Oo, kyawama, akyo *kyajinga*.’ Bino Amiwa kekala ne anweba. Kabiji ne bintu byonka byo Naubile, pano pantanda, Amiwa kekala mwi anweba, na kuuba bintutu bimo. Nanchi popo bakayuka. Abo bakamona Amiwa. Aye... Bantu bami bankamona Ami. Awa Lukunwa wakwa Abulahama ukamona Amiwa. Abo bakangyuka Amiwa. Abo bakavuluka Amiwa. Bakwabo bakangita Amiwa mba, ‘Belezebuba,’ pamo nobe byonka byo bauba. Bino anweba Mukangyuka Amiwa, mambo Amiwa kekala ne anweba. Anweba Mukamona Amiwa, kumona na jiso jobe. Anweba mukamona Amiwa, mambo Amiwa kekala nenu, kufikatu ne kupelo ya ntanda, byonka bintu bimo byo Nguba. Aye waitabila mwi Amiwa, mingilo Yonguba ne aye ukeyuba, nobe wamwingilo umo.”

<sup>60</sup> Kabiji, leelo, Kipwilo kya Lesa mumi kiji na jishuko ja kwimana kabiji ne kumona byo kibena kushinda, wasanguka Yesu Kilishitu, Mwaana wa Lesa mumi, kasa aimana pano, kwikala mu Kipwilo Kyanji, na kuuba kintu kimo kyo Aubilepo pa kyokya kimye. Nanchi twatambula nsakwa ya mulwanyi ujin yense.

<sup>61</sup> Inge uji na mulwanyi lukeelo luno, nanchi, mulongo wami, kujitu, inge wi Lukunwa wakwa Abulahama, panyuma ya kumvwa kikye, kechi mujipo bademona bavula mu kalunga kabafu bakonsha kulama yoya nsakwa ne. Kikashikuka. Amiwa kechi natakochi muchina nangwa kikale bye. Anweba mwaenda mwayako, nobe Lukunwa walaiwa, waamba mba, “Amiwa nakeba kikye kwikala kyami. Akye kyami, mambo Lesa wachipile mba Aye ukamusangula Yesu, kabiji, kupichila mwi Yesu, Amiwa kekishinda. Naiya mu Jizhina jayewa Kashinde, Yesu Kilishitu. Bwela kunyuma. Amiwa mbena kupita.” Amena. “Aye ukangata nsakwa ya balwanyi.” Nanchi waimana popa, na mapuzhi obe abwela lunyuma kabiji ne njikebo jobe kasa jibena kubembela, jamvwetwa na Mashi a Nkambo Yesu. Mulwanyi ukekiyuka.

<sup>62</sup> Inge muji na kyakukabila, ambai kwi Aye kimye kyo tubena kulomba, anweba muji muno, lukeelo luno, kimye kyo mwakunyika mitwe yenu. Kabiji inge uji na kyakukabila,

sutulaitu kuboko kwenu kwi Yesu? Kabiji kyambaitu mu muchima wenu, mu muchima wenu, ne kwamba mba, “Nkambo, Anweba mwayuka kukabila kwami. Bino, Naumvwa, lukeelo luno, kabiji ao ye Baibolo, ‘Aye ukangata nsakwa ya balwany.’ Amiwa mbena kwiya nakutambula nsakwa. Kapepo Amiwa zhingila bukiji. Kapepo Nakeba Mupashi Wazhila. Bubi bwakanshila panshi. Amiwa njina kyakukabila. Bino Mbena kwiya ku nsakwa. Amiwa nsakwiyangata, lukeelo luno, nsakwa yami. Nanchi, pana jishinda, Amiwa mbena kwiya kupita kokako.”

<sup>63</sup> Nkambo Wapeshiwa, Anweba mwamona onse oo maboko. Kabiji Anweba mwayuka mba akye kyo Kyambo Kyenu, Nkambo. Amiwa ne Kyambulatu, ne kwikileta mu Binembelo. Bantu ba mu Baibolo, byo bashijile bufumu ne kuuba byaoloka, kabiji bazhimishe mujilo, bukaji bwa mujilo, kabiji ne kupuluka ku mpoko, kabiji banshikile tunwa twa babokwe, kabiji, oo, kukijishamo, banabakazhi batambwile bafu baabo ke boomi, ne bintu byavula, mambo Anweba mwibilaile. Ke mulaye Wenu, “Lukunwa Wanji.” “Lukunwa Obe, Abulahama, ukangata nsakwa ya balwany.” Kabiji Anweba mulama mulaye Wenu.

<sup>64</sup> Pano panai kuji abo, Nkambo, kukabila kwa muchima wabo. Lekai bafume muno ke muntu wapusanako. Lekai bayenga, kasa bayuka mba ba—bakashinde, mambo awa Lukunwa wa Bufumu wibashiinjile. Aye Mfumu Wabufumu, byo Aishile, wasemekelwe mulusemo lwabukisungu, Aye washijile mulwany yense, kufikatu ne kulufu. Nanchi lufu alo lwine kechi lwakonsha kuchinisha Lukunwa wakwa Abulahama ne. Atweba tuji na mulaye amba tukaswana ntanda, kabiji tukabwela jibiji mu jishinda ja lukumo, mu mubiji walukumo, panyuma mulwany wabikwa panshi yakulu, kwa umo mwaana wakwa Lesa wapelako kutwela mu Bufumu.

<sup>65</sup> Inge kuji booba baji na maboko abo asutulwa peulu, Nkambo, abo ke bandengamambo, bapulushai. Aba babwela panyuma, bayukishai mba kechi bakonsha kutwajijila kwikala babwela panyuma ne. Aye kwangata yoya nsakwa yakubwela lunyuma. Kapepo yewa uzhingila bukiji, wa—wamwenga, lujimi watama, nangwa muchima walwiso, nangwa wakichima, a mali, nangwa—nangwa kintu kimo kyabubipisho, balekai bayuke mba bakonsha kutambula yoya nsakwa. Kapepo misongo, Nkambo, bya lumanamo. Bakonsha kutambula yoya nsakwa, “Mambo Aye waashilwe na mambo amizhilulwila yetu, wafumpilwe na mambo abubi bwetu. Lukabisho lwa mutende wetu lwajinga pe Aye, kabiji mo mubipumo Byanji mo twabukilwe.” Atweba twashinda, lukeelo luno. Kiswishai kye, Nkambo.

Kabiji pa byonse bye, aya mingilo ikatampe yaubile kwi Aye, nangwa byonkabyo Aye uji ne atweba. Nangwa byonkabyo, Aye walaile mba Ukeyyuba. “Pa kakimye kacheche ne bapano pantanda kechi bakomona Amiwa jibiji ne, pakuuba anweba



mukamona Amiwa; mambo Amiwa kekala ne anweba, ne mwi anweba, kufikatu ne kumpelo ya nkulo.” Nalomba, Taata, amba Anweba musakwiyukisha Anwebabene ku umo ne mukwabo, lukeelo luno. Mambo twikipuzha mu Jizhina ja Yesu. Amena.

<sup>66</sup> Bushe mwaketekela kyokyo mba kya Bukine nyi? Naluketekelo lwachichika mba kya Bukine, kechi pajipo nangwa lumo luzhinauko mu muchima obe ne. Pano vulukaitu kikye. Kwingila kwa Mupashi Wazhila kwapeela bingi kyakuuba mba kuvulang’anya maana abafunda. Bintu byavula byapeela bingi byo Nakonsha. . . Namonapo Mupashi Wazhila kasa oba kikye. Nakonsha kwamba bintu, kika, kechi Nakonsha kulanguluka mba byo kiji ne. Inge Nakonsha kwingijisha milanguluko yami, Nakonsha kwamba mba, “Kyawama, akyo kechi kyakonsha kwikalatu bulongo ne.” Bino kimye kyonse kijitu bulongo. Aye uba bintu byapeela bingi. Kabiji Aye uba bintu mba eyukishe Ayemwine ku bantu Banji. Lesa uji na bantu Banji. Aye uji mukachi ka bantu Banji. Aye wibatemwa. Kabiji Aye ukeba kwibobila, ne kwibakwasha; kabiji ne kwibayukishatu, kechi kyo *Akooba* ne, pakuuba abya *byo* Auba. Aye wikyuba kala. Ke kyobe. Kiji kulubaji lobe. Ke kya bupe kyafuma kwi Lesa wetu Taata, kuya ku Kipwilo Kyanji.

<sup>67</sup> Pano milanguluko ya maana a bumuntu yakonsha kwikala yazhobakana bingi, nobe mu moba akwa Danyela, ne mu moba a baana ba Kihebelu, kabiji—kabiji ne bavula bo twaambapo lukeelo luno. Monai, bafunda bakatampe muntanda mu ooa moba bajinga bakosa kwibashinda byonka byokijitu ne leelo. Kimye kyonse kikala mulwany, mwaila byo bekimona, kabiji ne saayasi wabo wakataka ne bintutu bikwabo, byajingatu byazhobakana ne bintutu bikwabo, mu milanguluko pakyokya kimye, nobe biji yetu leelo. Monai, kyajinga kintutu kimo. Bino kwajinga booba, kimye kyonse, bakonsheshe kwikala kokwa ne kwamba mba, “Lesa uji bulongo. Kyambo kya Lesa kyakine.”

<sup>68</sup> Kabiji, anweba, kechi mwakonsha kushinda ne, mambo Aye washijile. Kintutu kyo wafwainwa kuuba ke kuyakotu na kutola, ne kwimana pa nsakwa, ne kwamba mba, “Ke kyami. Akye ke kyami. Lesa wikipaine kwi amiwa, lupulukilo lwami. Inge Nakeba Mupashi Wazhila, Lesa Wamupaine kwi amiwa. Mulaye ye wami, ku baana betu, bonse baji kwalepa, ne bonse mo bavujila Nkambo bo aketa.” Oene mambo o Naimena. Ubaitu . . .

<sup>69</sup> Ng’ingijilo yami, ya kuyuka bapashi ne bikwabotu, katatakatu kikapwe. Oo, kimye kyonse kikekalanga konka. Bino katatakatu kikapwe, mambo kibena kuya ku kintu kyabaya. Mwamona? Kibena kuya kulutwe; kufuma ku kutola kuboko, kufikatu ne ku kuyuka bapashi, kabiji pano ubena kunengezha kuuba kintu kikwabo. Mwamona? Mwikimona. Kimonai ne kuyuka mba kyakine. Mwamona? Nayuka mba kya Bukine. Kabiji kikekala kyaya bingi, peulu, kyawamisha. Kine. Kika, Aye wikilaile. Kabiji akya kyo alaya Aye, Aye wikyuuaba.

Aye kechi wakonsha kukakalwa mu mulaye Wanji ne. Kabiji kyo kika? Kyeenyi Kyanji kitanwa-ne atweba kimye kyonse, kwikileka, yukai mba Aye wimwangachila nsakwa.

<sup>70</sup> Aye wajinga Lukunwa Wazhila. Kafwako nangwa umo wakonsheshe kwangata nsakwa ne kanatu Aye. Bonse ba kunyuma bajinga bivule bya kwiya Kwanji. Pakuuba byo Aishile, wapwisheshe nkondo yonse. Nkondo yapwile ku Ngesemani ne pa Kalvali. Kabiji pano twaimanatu, nobe bakashinde. Kechi kujipo nkondo ya kulwa ne. Atweba... Nkondo yapwa. Twiyinoka ke yetu, twaikalapo na luusa pe ayo. Luusa lwanembwa na Lesa, Taata wetu, Awo wasutwile kuboko Kwanji, waambile mba, “Amiwa nsaakwichipa Amiwa mwine amba Lukunwa waji ukangata nsakwa ya balwanyani.” Abyo byobyoyo kiji. Yaangatwa kala. “Aye wamanyikilwe na mambo amizhilulwila yetu. Ku bipumo Byanji ko twabukijilwe.” Kyaubiwa kala. Ke mwingilo wapwila jimo. Atweba twamwangata. “Kabiji mingilo Yonguba, ne anweba mukeyuba.” Aye Mfumu uji ne atweba, lukeelo luno. Mapesho Anji akatampe, Mupashi Wazhila, ubena kwenda pe atweba. Kumvwa aya ng’umvwino ya lukumo, pa kuyuka mba kine kiji na...mu ndonda na Kyambo kya Lesa. Kitupa lutekenesho lwawama bingi, lwa kuyuka mba—mba Lesa ye Shetu.

<sup>71</sup> Bino, Naketekela, bushe aye—bushe aye wajikupana bitupa bya milombelo lukeelo luno nyi? Najikumubuula, amba kijitu, inge mujitu bonka bantu ba mu tabbanako ne, kyawama, kechi mupane bitupa bya milombelo ne. Pakuuba umvwe kuji—kuji bavula bafika ku teeni, bantu fifitiini, nangwa kintu kimo, benyi mu bibelo byetu, kika, kupana bitupa bya milombelo, pakuuba mba twibaleta ne kwi balombelela. Baanga benyi botuji nabo lukeelo luno? Sutulai kuboko kwenu. Oo, ami! Kine. Paji fifitiini nangwa tweti pabaabo. Kijitu bulongo. Ntusakubika bibye bitupa bya milombelo kabiji ne kwibaleta ku pulatifomu. Monai, ene mambo o Naambila pa bantu ba ku “tabbanako”, bajji kuno.

<sup>72</sup> Akwe kuyuka bapashi, vulukai, Amiwa mbena kwamba kikye, byakuyuka bapashi katatakatu bikafike kumpelo, kukekala kintu kyabaya bingi kabiji ne kuwamisha, kiji mujishinda. Kwajinga, kyo Nayuka, monai mbena kutala pa balongo babiji, baimene ne amiwa keesha japita, akya byo kyamwekele, mwamona, kabiji ne juba jajingako, byo kyamwekele. Kabiji akya ke bimye bisatu byalondakana, bino, kyamweka, kushinikisha mba pano kiji pepi, monai, kibena kukeba kufikizhiwa.

<sup>73</sup> Pano, Nkambo, Anweba mwi Lesa, kabiji atweba twi bakalume Benu. Twimusachila Anweba pa Kyambo Kyenu, pa Mupashi Wazhila, Ao wapesha michima yetu. Kabiji pano tuji bingi na lusekelo. Twaikala muno, kasa twayuka mba twiba kushinda. Tuji kala na nsakwa ya balwanyani. Kyapewa

kwi atweba, kabiji tuji na kii mukatampe mu maboko etu. Jizhina ja Yesu Kilishitu jikekala jibu-. . .shikulai nsakwa yonse ya balwanyi. Tolai yuwe kii, ba kii ba Jizhina ja Yesu, kabiji wabul-. . .kushikula nsakwa yonse ya balwanyi yakukasa kufuma ku mulaye uji yense.

Kabiji, Lesa, lukeelo luno twaiya mu Jizhina ja Yesu, na yuwe kii, na kushikula nsakwa ya bakolwa ne bamanyikwa. Mambo kyanembwa mu—mu Kyambo Kyanji, “Mu Jizhina Jami bakapangilamo bademona. Bakamba na jimi ipya. Kabiji umvwe batoola milolo, nangwa kuntooma bifwana, kechi bikebabeleka ne. Bakabika maboko abo pa bakolwa kabiji bakakosa.” Twayuka mba abye bintu bya kine. Kabiji swishai, lukeelo luno, Nkambo, amba bakonsha, bantu bakonshe kumona kyokya, kupichila mukusololwa kwa Kyambo kya alukile ke muntu ne kwikala waikela mukachi ketu, amba, “Aye waashilwe na mambo amizhilulwila yetu; ku bipumo Byanji ko twabukijilwe.” Kabiji lekai be kitambule ne kubukwa, lukeelo luno, kufuma ku misongo yabo ne bikola byabo ne makatazho. Twikipuzha mu Jizhina ja Yesu. Amena.

<sup>74</sup> Mwakonsha kwimba, Teddy, *Ketekelaitu*, na kuzhindama kabiji bitende bitende, inge mwakonsha.

Kabiji kika? Mwatatwijile kufuma ku wanu? Nambala wanu, kitupa kya milombelo. Wanu, tuu, fiili, foolo, faivi, sikisi, sebeni, eiti, naini, teeni, nangwa monse mo kyaikela. Kijitu bulongo. Mwakonsha mu kuzhindama, inge mwakonsha kwimana, iyai kuno kulubaji.

[Mulongo umo waamba mba, “Baanga bomwajikwita?”—Waku.] Uu? [Muntu umo waamba mba, “Akyo byokiji. Abyo byokiji.”] Nobe. . .

Twayai tumone, nambala wanu, nambala tuu. Nambala ya kitupa kya milombelo? [Mulongo waamba mba, “Njinakyo.”—Waku.] Ee. Nambala ya bubiji. Kijitu bulongo, mwane. Nambala fiili, nambala foolo, nambala faivi, nambala sikisi, nambala sebeni, nambala eiti, nambala naini, teeni.

<sup>75</sup> Kimye kyo babena kulenga jishinda jabo ne kutola kifulo kyabo kya kwimana, Nasaka kwipuzhako jipuzho kwi anweba bamo. Baanga, mujipo bantu ba ku tabbanako muno, bakolwa? Bantu ba ku tabbanako, sutulai kuboko kwenu. Pepi nobe faivi. . .foolo, faivi, sikisi, sebeni. Eiti nangwa maboko naini. Mujipo muntu umo muno mu tabbanako, awo wabula wa kuno ku tabbanako, beenyi ne atweba, nangwa mwajikufwainwa kwiya mu kupwila kabiji kechi mwakutambula kitupa kya milombelo ne? Mwakonsha kusutulako kuboko kwenu nyi? Uji yense ukeba Lesa, awo wabula. . .abo—abo babula kiiya ku ino tabbanako. Yense muno wabula membala wa ino tabbanako, kabiji—kabiji nangwa byonkabyo wakolwa kechi uji na kitupa kya milombelo ne, mubena kukeba kuvulukwa mu milombelo?

Mwakonsha kusutulako kuboko kwenu, muntu yense? Kijitu bulongo. Akyo kyawama. Kijitu bulongo.

<sup>76</sup> Pano Mbeni kwipuzha inge mwakonsha kwikalatu na muneema, pa ma—pa mamineti achehetu, kabiji pano tusakutatulatu kuya kulutwe. Pano twayai tumone. Muji na puzha yashalapo, Billy? Kijitu bulongo. Bushe abo bobaji na nambala teeni koko nyi? Naita wanu kufika pa teeni.

Leveni, twelufu, satiini, fotiini, fifitiini, balekai bemane ponkapano. Inge baji nambala teeni, leveni, twelufu, satiini, fotiini, fifitiini, balekai bemane. Kijitu bulongo. Wanu, tuu, fiili, foolo, faivi, sikisi, sebeni, eiti, naini, teeni, leveni, twelufu. Pabujila pepi nobe babiji, kufuma ku wanu kufika pa fifitiini. (. . . ? . . . sebeni, eiti, naini, teeni, leveni.) Fifitiini, sikisitiini, sebetiini, eitiini, naitiini, tweti.

<sup>77</sup> Oo, pembelaikotu mineti umo. Na—Najikumubuula kupana bitupa bya milombelo ku bantu babula ba mu tabbanako. Abyo ibyo. Mwamona? Mambo, kyafwainwa kwikala, kumona, kuyuka bapashi. Bantu baamba mba, “Abo bantu beya ku tabbanako.” Mwamona? Ne—Ne mubuula. Baanga batanwako kuno. . . babuula kutanwako kala kuno ne? Twayai tumone maboko enu, kafwako nangwa umo ao watanwako kala mu kupwila kwami. Kijitu bulongo. Kijitu bulongo.

Pano, kijitu bulongo, pa kakimyetu kacheche, Mulongo Teddy.

<sup>78</sup> Pano Nakonsha kwamba kikye, amba, anweba bonse mwaumvwapo pa mpwijilo, byo kyubiwa, nangwa byonkabyo, mwaumvwapo, bonse bantu batanwapo kala mu mbung’eno? Mwamona? Kimye Nkambo yetu Yesu byo ajinga pano pantanda, Aye kechi waambile mba ne ubuka ne. Aye wajinga Lukunwa wakwa Abulahama, kinetu, kabiji Wajinga Nanji mulaye. Aye waambile mba Aye kechi waubilepo kintu nangwa kimo ne kana Bashanji ba Mumweshakyo. Abyo ibyo nyi? Kabiji Aye waambile mba, “Amiwa kafwako kyo nakonsha kuuba ne kana Bataata bamweshi Amiwa bya kuuba.” Kabiji Aye wikimwene monka. . . Ine “poso Bataata *Bambuula*.” “Poso Bataata *bamweshi* Amiwa.” Yoano Wazhila 5:19, “Kyo Mona Bataata kasa booba, kyo kyubapo ne Mwaana nanji pomo.”

<sup>79</sup> Pano Aye byo—Aye byo aishile, twatana kuuba mba, mu ntendekelo ya mwingilo Wanji, amba panyuma Yakutola akya—akya kipona kya kwa Davida. . . [Kafwapo bijipo pa tepu ne—Waku.] Kwamba mwaila bumupashi, aye. . .

Kimye Mupashi Wazhila byo aishile pe Aye pa lubatizhilo, lwa Yoano, kabiji Waikela ke Mesiyasa washingwa manyi. Bino, vulukai, Aye wajinga Mwaana wakwa Lesa kimye kyo Asemekelwe. Aye wajinga Mwaana wakwa Lesa wasemekwa-mukisungu. Pakuuba Aye byo aikele Mesiyasa, kyo kimye Mupashi Wazhila kyo aishile pe Aye, mambo *Mesiyasa*

kyalumbulula mba “washingwa manyi.” Mwamona? Kabiji Aye wajinga Awa mushingwa kimye Mupashi Wazhila kyo aishile pe Aye. Mwang’umwapo kusapwila pa *Mwanamukoko Ne Nkunda*. Nanchi twatana kuuba mba, kimye Aye. . . Panyuma ya moba foote a lweseko, Aye wafuminemo.

<sup>80</sup> Kabiji mwingilo Wanji watatwile byepi, kabiji wapwile byepi? Twatana kuuba mba, mu mwingilo Wanji mwajinga muntu wa jizhina ja Andeleo, awa waile na kutana mulongo wanji, Shimona, ke funji wamasabi, kabiji wamuletele kwi Yesu. Kabiji Yesu wamwambijile, mba, “Jizhina jobe wi Shimona. Jizhina ja bashobe ke ba Yona. Kufuma pa kino kimye obewa ukatelwa mba *Petelo*, akyo kyalumbulula mba ‘jibwe jicheche.’” Anweba mwavuluka kyokyo nyi? Kabiji awe mulunda wajinga wakuminye bingi pa byamubuujiile Yesu!

Bino, bushe Mesiyasa wafwaijilwe kuuba kyokya? Baanga bayuka kyokyo, ambai mba, “Amena.” Aye wajinga Lesa-Ngauzhi. Ee, mwane. Mosesa waambile mba, “Aye Yehoba Lesa wenu ukemwimenya Ngauzhi uji pamo nobe amiwa. Kikeya kufikizhiwa mba ukabula kumvwa yuwe Ngauzhi ukachibiwako kufuma mukachi ka bantu.”

<sup>81</sup> Pano, nanchi byo twatana, palutwe, Yanji. . . “Waishile ku Bakwanji Mwine.” Bobang’anyi? Ba Yudeya, mwaila kisemwa. “Kabiji nanchi Bakwanji Mwine kechi bamutambwile Aye ne,” nanchi Aye wajinga pa kyokya kimye. . . Pano kyafwainwa kuya ku Bangentila, monai, mambo Bakwanji Mwine kechi bamutambwile Aye ne. “Bino bonse mobavujila ba Mutambwile, abo ibo bo Apele luusa lwa kwikala ke baana bakwa Lesa.” Nanchi pano Aye waalulukila ku Bangentila, kabiji kyaikala, pa myaka masauzande abiji. Pano bino monai bintu byo Aubile.

<sup>82</sup> Nanchi Filipa, panyuma ya kumona kikye kubiwa, aye waile na kutana Natanela, kabiji wamubujile Natanela Ye ataine kabiji ne byo Aubile. Kabiji akya kyamukumishe. Aye kechi waswile nangwa pachechetu ne. Bino byo afikile mu Kyeenyi kya Nkambo Yesu, byo ataine Koajinga, waishile mu Kyeenyi Kyanji, Yesu waambile mba, “Talai mwina Isalela mwabula nangwa bubi ne.”

<sup>83</sup> Bino, inge yenu mwaimene popa, mwalanguluka mba mwafwaijilwe ba bumupashi kyakuuba mba mwakonsha kumukwatakanya Awa wajinga ng’anyi? Mwalanguluka mba mwafwaijilwe kwikyuba? Pano monai. Mwamona? Awa Muntu, wajingatu Mwenyi, wa masa-. . . kokwa, Aye wafwaijilwe kwikala funji wa masabi. Aye wajinga wa mapulanga, abyo Aye byo ajinga. Awe Muntu wa mapulanga waimana popa, Muntu wa myaka-yapakachi. Kabiji kwaiya ne yuwe muntu. Aye wamutajile, nobe umo wa baabo banabalume kukwe, ne kwaamba mba, “Talai mwina Isalela mwabula nangwa bubi ne.” Kyawama, Aye wakonsha kuyuka byepi amba wajinga mwina Isalela? Kechi mujishinda jo amvwajilemo ne, mambo

bonse bavwalangatu musango umo. “Mwi aye mwabula nangwa bubi ne.” Wayukile byepi Aye amba awa wajinga muntu wa—wabulamo bubi?

<sup>84</sup> Nanchi kyamukumishe yuwe muntu. Byo ajinga waitabila wakine, aye waambile mba, “Labbi,” nangwa mulongo, musapwishi, mufunjishi, “Anweba kwepi nkomwamwenejile ami?” Monai, wamwipwizhenga Aye.

<sup>85</sup> Aye waambile mba, “Pilipa kasa akyangye kukwita, kimye kyo wajinga mushi ya kichi, Amiwa nakumwene.”

Aye waambile mba, “Obewa wi Mwaana wakwa Lesa. Obewa wi Mfumu wa Isalela.”

<sup>86</sup> Yesu waambile mba, “Mambo Nemubuula kikye, pano anweba mwaketekela Amiwa? Pano mukamona bintu bikatampe kukila pa kikye.”

<sup>87</sup> Kabiji ao oene mambo o Naketekela mba Kipwilo kya Lesa mumi kikamona kintu kikatampe kyakila pa kikye. Kibena kwinegezha kutapuka ntapulo pa kyonka kino kimye, pepitu, monai, mambo bekiketekela. Aba bekikana, mambo a byamba bya mandinominesheni, Nazhinauka kana bakonsha kuketekela kintu kiji kyonse. Mwamona? Bintu . . . Obewa wakonsha kwenda mu Kyeya nangwa kwikala mpofu. Kyeya kimpofula, nangwa kimweshwa jishinda.

<sup>88</sup> Tung’onyi tucheche, Nataine, ku Kibumbwa kya Bwanabwabene. Ukamone kine kuuba mba, Mulongo Thomas, inge mwafikako, mwamona. Ato twipuma mitwe yato, ku kyokakya mba. Kabiji Naambile mba, “Lukatazho lo lwepi?”

<sup>89</sup> Waambile mba, “Mukifulo kya kulondela kyeya, kiji mulubesha, kuya nakufyama, baesekele kufumyamo kyeya. Beipaya abo bene.”

<sup>90</sup> Akyo kyo kintutu kimweka inge mwipuma ku Kyeya, wiyipaya obewa mwine, bumupashi. Endaitu mu Kyeya nobe byonka byo Anji mu Kyeya, nishi tukekala na lumvwang’ano lwa bupopweshi umo ne mukwabo, bipwilo byonse bikaketekela ku ne kutwajijila na kumvwa buwame bwa mapesho akwa Lesa. Bushe kyokyo kechi kyawama nenyi?

<sup>91</sup> Monai pa mwanamukazhi mwina Samaliya kimye kyo aishile. Wajinga mwina Samaliya, pano (kechi Muyudeya ne), mwina Samaliya. Kabiji Aye waambile mba, “Ndetelepo Ami byakutoma.” Kabiji misambo yatwajijiletu.

Akye ke kyabooba baiya katataka pano.

<sup>92</sup> Kabiji misambo yatwajijiletu. Bino, aye kechi wayukile mba Aye wajinga Mesiyasa ne. Aye wajingatu mu—mu Muntu, Muyudeya. Monai byo aambile patanshi? Aye waambile mba, “Kika, kechi kyafwainwa obewa Muyudeya kwamba ku mwanamukazhi mwina Samaliya byonka bye ne.” Waambile mba, “Atweba kechi tujipo na nyingijilo umo na mukwabo ne.”

93 Aye waambile mba, “Bino umvwe wayuka Ye ubena kwisambananji, inge wangimpuzha Amiwa byakutoma. Kabiji Nakonsha kukuletela, na kupa meema, kechi ukeyapo jibiji kuno na kutapula meema ne.”

94 Kika, aye waambile mba, “Pano kaminetitu kamo.” Aye waambile mba, “Tupopwela muyuwe mutumba, kabiji—kabiji anweba Bayudeya mupopwela ku Yelusalema.”

95 Yesu waambile mba, “Pakuuba kimye kibena kwiya kyo—kyo mukabula kupopwela mu Yelusalema nangwa mu ye uno mutumba ne, pakuuba mu Mupashi. Mambo Lesa ye Mupashi, kabiji abo ba mupopwela Aye bafwainwa kumupopwela Aye mu Mupashi ne mu Bukine.” Mwamona? Kyawama, Aye watwajijiletu, na misambo poso Aye byo amwene paji lukatazho. Kika, mwayuka lukatazho lwanji polwajinga? Muntu yense wayuka lukatazho lwajinga na mwanamukazhi ku mushima? Aye wajinga na banabalume bavula, kechi ibyo nenyi? Nanchi Aye waambile kwi aye mba, “Yanga ukalete mulume obe eye kuno.”

Aye waambile mba, “Amiwa kechi njipo na mulume ne.”

96 Waambile mba, “Abyo ibyo. Uji na batanu, kabiji ne yuwe ye uji nanji kechi obe ne.”

97 Aye waambile mba, “Mwane!” Pano mumonai. “Mwane, Nayuka mba Anweba mwi Ngauzhi.”

Inge mwabweluluka mutangilo ya kwapela, mwakonsha kwikitana. “Mwane,” mu kiine kitanshi, “Anweba yenu, Naketekela namba, Anweba *mwi* Ngauzhi.” Vulukai, mu Baibolo, watwajijiletu na kwamba mba, “Awa Ngauzhi, ye Obewa ‘awa Ngauzhi?’” Wajinga ng’anyi Ngauzhi? Awa Umo Mosesa ye aambile mba ukeya.

“Naketekela mba Anweba mwi Ngauzhi. Bino, twafunjishiwa, kabiji twayuka mba Mesiyasa byo akeya, Aye ukoba bibye bintu.” Akya kyajinga kiyukilo kya Mesiyasa. Abyo ibyo nyi? Kuyuka lukatazho lwanji byolwajinga. Waambile mba, “Twayuka mba umvwe Mesiyasa waiya, Aye uketubula bibye bintu. Pakuuba Obewa yobe Ng’anyi?”

Aye waambile mba, “Amiwa yami Iye, ubena kwamba kwi obewa.”

98 Mwanamukazhi wanshile mulondo wanji wa meema, ne kunyemena mumuzhi, Nalanguluka mba, wakwachiletu muchima wanji, kabiji ne kwamba mba, kasa akwata maboko anji pa kyaji na kukilauka, kasa amba mba, “Iyai, mumone Muntu Awo waambula bintu byo Naubile. Bushe awe kechi ye Mesiyasa nenyi? Bushe awa kechi Iye Baibolo ye aamba mba ukeya? Ke muyudeya tu waikala popa, ke Muntu yenkawe, wamwekelenga nobe wingila na mapulanga. Bino Aye wambujile mba Nji na banabalume faivi, kabiji anweba bonse mwayuka

mba abo bo bukine. Awe wafwainwa kwikala Mesiyasa.” Abyo ibyo nyi?

<sup>99</sup> Bino, Yesu waambile mba, “Pa kakimye kacheche, kimye kicheche kyatongolwa, ba pantanda kechi Bakamona jibiji ne. Nangwa byonkabyo, anweba Mukamona, mambo Amiwa kekala ne anweba, monka mwi anweba. Kabiji mingilo yo Nyingila ne anweba mukeyuba. Ne yavula kukila byo Nauba pano, mukeyuba, pakuuba Amiwa ngya ku Bataata, kubwela mu musango wa Mupashi.”

Kitapisho kyalipilwa. Aye Lukunwa Wazhila wafwile; aye Lukunwa Wazhila wasangukile jibiji. Pano Kipwilo kyaikala kyabingishiwa, ponka pakwitabila kyokyo, kabiji Lukunwa Wazhila wakonsha kwiya mu babo bantu kabiji ne kwibalula ke bakuswana pamo ne aye, baana babalume ne babakazhi bakwa Lesa.

<sup>100</sup> Pano, kwi anweba bashalapo, babula muyuwe mulaini wa milombelo, Amiwa naji kumubula kupana bitupa ku bantu baji . . . byo Najikumwita lukeelo luno. Aye wajikungita, ne kwaamba mba, “Amiwa nakeba kuya na kupana bitupa bimo, taata?”

<sup>101</sup> Najikwamba mba, “Inge kuji bantu bavula kufika ku teni babula ba mu ino tabbanako.”

<sup>102</sup> Pano, kimye kimo mu tabbanako Amiwa ngita ne kupana bitupa byamilombelo. Obewa wabwela, waamba mba, “Kyawama, ne bayuka. Bafuma mu tabbanako. Aye wayukile musango wabo. Kine.”

<sup>103</sup> Nanchi Najikwaluluka, Ne kwamba mba, “Bonka babula ba mutabbanako, iya. Kijitu bulongo. Anweba mwabula ba mu tabbanako, yenu musakwikala mu mulaini wa milombelo.”

<sup>104</sup> “Oo, atweba kechi twibayuka ne,” byo byaamba tabbanako. “Atweba kechi twayuka lukatazho lwabo byo luji ne. Aye kape wajikubepanga bubela pa kikyee.” Mwamona?

<sup>105</sup> Nanchi Naamba mba, “Kafwako muntu waishileko ne. Lekai Mupashi Wazhila atole boba baji muno abo babula ba mu ino tabbanako, baikalatu popo.” Zhindamaitu, anweba ubaitu . . .

<sup>106</sup> Kechi kujipo jishinda nangwa pachechetu ne, ja kutwajilamo muntu kwi Lesa, kanatu aye watongwelwa jimo kwikala mwaana wakwa Lesa. Kechi kujipo jishinda ja kwikyubilamo ne. Yesu waambile mba, “Kafwako muntu nangwa umo wakonsha kwiya kwi Amiwa ne kanatu Ba Taata bamukoka.” Kabiji abo bo Bukine. Byonse byo Aubile, kwajingapo kintu kimo kyapusanako. “Inge Aye wikyubile *muyuwe* musango, kyafwainwa kwikala *mujije* jishinda. Kabiji *nejije* jishinda, kyafwainwa kubwela *mujoja* jishinda.” Monai, ke kubulatu luketekelo. Pakuuba maana abingishiwa ku baana banji. Nanchi, anweba, mwamona.



<sup>107</sup> Pano papo, Mbeni kweseka kwamba ku—ku kikyepi kipwilo kya bantu, akye, amba Yesu Kilishitu wajinga awa Lukunwa Wazhila. Kechi atweba ne; ke Aye. Atweba twi baswanyitu bakyokyo, bino bintu byonse ke byetu. Ibyepi umvwe anweba mwaimana popa mujoja juba Shimona byo aishile? Kabiji, anweba, kafwako nangwa umo. . . Akye kyo kintu kitanshi kyo Aubile.

<sup>108</sup> Pano, akyo kisakwikala kintu kitanshi kya baabo bantu, inge Aye wikyuba. Abo kechi be kimonapo kala ne.

<sup>109</sup> Pakuuba Shimona byo aishile, mukote funji wa masabi, kechi wafunjilepo kyakuuba mba wakonsha kufwachika jizhina janji pa kipepala ne. Aye Baibolo waamba mba wajinga “wabula kuyukapo kintu nangwa kimo kabiji ne kubula kufunda.” *Kabiji* ke kintu kinungakanyatu. Byonse bibiji, “wabula kuyukapo kintu nangwa kimo kabiji ne kubula kufunda.” Kabiji byo Aendele kwiya, mu kiyukilo, na bulume. . . Yesu, Yesu waambile mba, “Jizhina jobe wi Shimona.” Anweba mwalanguluka mba walangulukile ka? Wafwaijilwe kulanguluka ka inge waimene popa? “Kabiji jizhina ja bashobe ke ba Yona. Kabiji kufuma pa kino kimye obewa ukatelwa mba Petelo.” Kika—kika kyowakonsha kulanguluka? Bushe awe Muntu watangilenga milanguluko yanji? Kyawama, mwakonsha kulanguluka kika? Bushe mwakonsha kulanguluka mba akya kyajinga kiyukilo kya Mesiyasa nyi?

<sup>110</sup> Inge akya kyo kiyukilo kya Mesiyasa mu nkulo imo, kyafwainwa kwikala kiyukilo kya Mesiyasa, mu nkulo ya bubiji, mu nkulo ya busatu, mu nkulo ya buna. Mankulo onse afwainwa kwikalatu musango umo, mambo Lesa kechi wakonsha kupipula ne. Kabiji baanga bayuka mba Mesiyasa wajinga Lesa? Kine. Wajinga Awa mushingwa. Kine. Nanchi Aye kechi wakonsha kupipula ne. Aye wafwainwa kwikalatu musango umo.

<sup>111</sup> Ao oene mambo Aye kyo apanyijile bukamonyi na kintu kimo kubena Samaliya kyonka kyo Aubilepo ku ba Yudeya. Mambo, mitundu isatu ya bantu ke bano Hamu, Shema, ne bantu bakwa Yafeti; Mu yudeya, Mungentila, ne mwina Samaliya.

<sup>112</sup> Pano, monai Mupashi Wazhila? Baanga bayuka mba Petelo wajinga na bakii ba mu Bufumu? Bushe mwamona nyi? Aye washikwile pa Juba ja Pentekositi, ku ba Yudeya. Filipa waile konka na kusapwila ku bena Samaliya, kabiji ne kwibatizha mu Jizhina ja Yesu Kilishitu, bino Mupashi Wazhila kechi wakifikile pe abo ne. Batumenye na kuleta Petelo, ao wabikile maboko anji pe abo kabiji batambwile Mupashi Wazhila. Abyo ibyo? Kabiji Koneleusa, awa—awa mu Ngentila wa Mutambwile. Aba bajinga bobonka. Kufumatu pankyokya kimye ne kuya kulutwe, aye washikwilwa ku byonse. Nanchi abyoybyo kiji, monai, Aye wikinshikwile. Lesa uji na mashinda a mwakubila bintu.

<sup>113</sup> Pano, lukeelo luno, inge awe Umo Wapaine Mulaye ku Lukunwa, kabiji umvwe lukunwa waikala muno...Nasaka kuketekela bonse muno byo muji. Inge Lukunwa waikala muno, kinetu Lukunwa ukamona Mulaye. Pano, abo bantu bonse baimana muno baji kusutula maboko abo, bakyangye kutanwapo kala mu mbung'eno ne. Abo ke benyi kwi amiwa. Amiwa kechi nayukapo nangwa umu ne. Beyatu muno. Kabiji ne mamineti acheche apitapo, Billy wajikupana kitupa kya milombelo, kabiji baji papo baimana muno. Muji bavula bingi mwi anweba, mwajikusutula maboko enu, amba anweba kechi muji na bitupa bya milombelo ne, kabiji mukijitu benyi muno. Abo kechi bajipo na kintu kimo kyakwingila nakyo ne. Obewa waketekelatu mba wiswanyi wa mumulaye. Obewa waketekelatu mba konka ku bipumo Byanji ko twabukijilwe. Kabiji waketekela kyokyo na muchima obe yense, kabiji ne ku mumona Aye.

<sup>114</sup> Kintutu kimo kiji kikye kya bupe, ke kwipanatu obewa mwine kwi Aye. Amiwa kechi naambapo kintu nangwa kimo ne; Aye ye wambatu. Kabiji umvwe Ye Mupashi Wanji wa bungauzhi, ngauzhi kimye kyonse wajinga na ABYO BYOBYAAMBA AYE NKAMBO. Kimye kyonse byajingatu bulongo. Kabiji kechi wakonsha kwipuzha Lufunjisho ne, mambo kyafwainwa kupana ndoonda na Baibolo, inge ye Lesa. Lesa kechi wakonsha kwambapo kintu kimo, kabiji ne kubwela na kwi kizhobakanya. Kyafwainwa kwikala kintutu kimo kimye kyonse.

<sup>115</sup> Bino, anweba muji koko, mwaketekela. Na byonse biji mwi anweba, mwaketekela. Pano kechi mwafwainwa kwendauka ne. Ikalaitu nzoo, uji yense.

Nanchi bitende bitende kabiji ne kunekena mo kyafwainwa kubiwa.

Kyamweka kubiwa, lukeelo luno, amba muntu mutanshi waimana pano kuno ke mwanamulume. Pano tusa kusenda kikye Kinembelo.

<sup>116</sup> Pano mwamona po Naimana nyi? Baanga bakonsha kumvwa kyokyo? Kuno kuji banabalume ne banabakazhi baimana kuno, abo kechi Nakibamonapo ne, mu bumi bwami. Abo kechi bakitanwapo mu mbung'eno ne, kabiji mwamona po baimana. Abo kechi bayuka kisakumweka ne. Amiwa kechi nayuka kisakumweka ne. Pakuuba Lesa wikilaile. Abulahama kechi wayukile kikamweka ne byo atolele mupenyi wakwipaya Izaka, bino Lesa wamulaile. Akyo kyapwishishe byonsetu. Aye wamutambwile nobe umu wafuma mubafu, byo ayukile mba Aye wakonsha kumusangula kufuma mubafu. Abyo ibyo nyi? Nanchi akyo kyapwisha byonse.

<sup>117</sup> Pano, papo pajipo mwanamulume umu waimana kulubaji lwami, Amiwa kechi na mumonapo ne, kafwapo nangwa kimo

kyo nayuka pe aye ne. Twibenyi umo ku mukwabo. Atweba kechi twiyuka umo ne mukwabo ne. Lesa wituyuka bonse babiji.

Pano, na kyabupe kya Bulesa, inge Nakonsha na kya bupe. . . Pano, abyoyabupe bisemekwa mwi obewa. Lesa watongwejile jimo kintendekesho kya inontanda kasa kikiyangye kwikalako. Baanga bayuka kyokyo? Nanchi kechi kyakonsha kwikala kintu kimo kyo Najinga nakyo ne, kwikala na kya bupe. Lesa wasajile kyokya. Amiwa kechi nasajile kyokya ne. Aye wasajile kyokya. Mwamona? Nobe bangauzhi ba mu Lulayang'ano Lwakala, kabiji ne bantu bapusanako, batongwejilwe jimo amba bekyube, kuuba kikyeye.

<sup>118</sup> Pano, inge muntu wakolwa, Amiwa kechi nakonsha kumubuka ne. Inge muntu uji mu kyakukabila, kyaila mukuuba mba kyo akeba kana Nakonsha ku mukwasha nangwa ine. Kyafwainwa kwikala, inge kyajinga kintu kikwabo nobe aye. . . kintu kimo kicheche kyo Nakonsha kumukwasha, kika, Nakonsha kutemwa kwikyuba. Kapepo aye uzhingila bukiji. Kapepo kechi Mwinakilishitu ne. Kapepo aye Mwinakilishitu. Kapepo aye wapashang'anya. Amiwa kechi nayuka ne. Pano ibyepi kapepo bulwanyi bwa bufyafya, bwatwelamo, kabiji bwaiya kuno kabiji ne kwilenga aye mwine nobe kintu kimo? Monai kimweka, monai, ubaitu—ubaitu mumone kisakumweka. Amiwa kechi nayuka ne.

<sup>119</sup> Bino, monai, waimana kuno, nanchi wafwainwa kwimana bulongo, kasa mwayuka mba Lesa ye walaile, Lesa ulama mulaye Wanji. Mwamona? Pano, inge Lesa walama mulaye Wanji, pakachi, ponka pakino kimye, ku baabo bantu; baanga baji koko basakwikala konkako, kabiji na muchima obe yense usakwikitabila? Muchima obe yense, usa kuketekela nyi? Nanchi muketekeletu amiwa.

<sup>120</sup> Pano twayai tumone. Twayai tutole Kinembelo. Pano, Shimona Petelo waishile kwi Nkambo Yesu. Kabiji byo afikile ngi Nkambo Yesu, aye Nkambo Yesu wamubuujile wajinga ng'anyi, kabiji—kabiji ne kumubuula bintu bya pa bumi bwanji. Kyawama, Yesu umo ukiji na bumi ne leelo. Aye. . . Bushe mwaketekela mba Aye wasangukile kufuma mubafu? Bushe mwaketekela mba Mupashi wa Bumesiya uji mu Kipwilo, leelo, pamo nobe Byonka byo aubilenga kimye kyonse? Kijitu bulongo.

<sup>121</sup> Pano, anweba muji mu jibumba, abo babula kitupa kyamilombelo, anweba talai kululwe lubaji ne kwamba mba, “Nkambo!” Nangwa byonkabyo, kechi mujipo bitupa bya milombelo mu jibumba ne, Amiwa njinabo bonse baimana muno. Anweba muji mu jibumba ambai mba, “Nkambo, Anweba kwatai amiwa.” Monai kibena kumweka. Monai kibena kumweka. . . ? . . .

<sup>122</sup> Pano, mwane, inge kwajingapo jishinda mu ntanda ja kupainamo bukwasho kwi anweba, Nakonsha kwikyuba. Monai, Amiwa jitu, twi benyi muno, kabiji Na—Nakumanya kimye kitanshi. Bino Amiwa njina nsambu, nobe wamwingilo, kubulang'ana Bukine kabiji ne kwikala kamonyi wa Yesu Kilishitu. Kabiji, pano, Amiwa kechi mbena kukeba obewa kumbula kiji kyonse ne. Nasakatu obewa kukumbula kana bukine nangwa ine, kabiji mumuleke Aye ekyube. Kabiji inge Aye wakonsha kwikyuba mu musangotu umo kuno ku pulatifomu, kupichila mu yuwe mubiji, byonka byo Aubile kupichila mu mubiji wa Yesu!

Awa ye Lesa, mwi Kilishitu. Yesu waambile mba, “Amiwa kechi nguba kintu nangwa kimo ne kana ba Taata, baji mwi Amiwa, bamweshwa Amiwa. Abo bambula byo Nafwainwa kuuba.” Nanchi kechi kyajinga Yesu wabujile yewa mwanamukazhi ne. Wajinga Shanji, mwi Aye, wabuujile mwanamukazhi. Kyajinga—kechi kyajinga Yesu wayukile Shimona Petelo mba yeng'anyi ne, bajinga Bashanji baikele mwi Aye, bo bayukile Shimona Petelo ye ng'anyi. Abyo byokiji. Mwamona? Byokiji.

<sup>123</sup> Nakonsha kukubula, pano, obewa wi Mwinakilishitu, ee, mwane, mambo obewa uji na—na—na mupashi utambulwila bingi lubilo. Kabiji, aye, ye waitabila. Aye ke Mwinakilishitu. Kabiji obewa ubena kumanama ku musongo wa mishipeshipe upana lukatazho munda. Abyo ibyo nyi? [Aye mulongo waamba mba, “Abyo ibyo.”—Waku.] Mwamona? Mwamona? Bino, abyo kine ibyo. Kyaubiwa byepi? Nayuka byepi kyokyo Amiwa? Byepi panopantanda Nakonsha kuyuka byepi? Atweba kechi twakimonang'anapo kala ne. Akyo kyakine. Bushe kechi ibyo nenyi? [“Akyo kyakine.”] Kapapo Aye usa kukubulapo kintu kikwabo pe obewa mwine. Amiwa nsakwimubuula. Pajipo kintu kimo. Namona mwanamukazhi uji kwipi ne obewa. Uji ne obewa. Ke mukazhi obe. Kabiji ubena kukeba bukwasho, ne aye. Ee, mwane. Anweba mwaketekela mba Lesa wakonsha kumbula kyatama ku bakazhi benu nyi? [“Nayuka mba Aye wakonsha.”] Kijitu bulongo, mwane. Uji na lukatazho lwa muchima, byalubankana. Abyo ibyo. Kechi ibyo nenyi? Lubazhibazhi, ne aye. Ee, mwane. Pano, obewa kechi wafuma mu uno muzhi ne. Obewa ubwela *mujije* jishinda pakuya ku nzubo, kuya ku Cincinnati. Abyo ibyo. Obewa wafuma ku Cincinnati, Ohio. Jizhina jenu mwiba Milliken. Bwelai, bwelai ku muzhi, mwikale bulongo. Aye Nkambo ukemupesha kabiji anweba mwabukwa, obewa ne bakazhi benu. Lesa emupeshe.

Iyai, mwane. Anweba mwaketekela nyi? Pano ikalaitu na lwitabilo. Kuzhinauka ne.

<sup>124</sup> Pano ikalaitu na munema. Muntu yense pano ikalaitu na munema, zhindamaitu zoo. Monai, aye Mupashi Wazhila wikala wabula kukasuluka. Baanga bayuka kyokyo? Kechi wakasuluka

ne, Mupashi Wazhila, kabiji kukatazhiwatu pacheche Aye wikala wasakamana.

<sup>125</sup> Mwaila badokotala, wafwainwa kufwa ponkapotu, na lukatazho lwa muchima. Abyo ibyo. Obewa waiya kuno kufuma ku Chicago, Mr. Mosley. Jizhina jobe jitashi ke Theodore. Mwaketekela Lesa nyi? [Aye mulongo waamba mba, “Ee.”—Waku.] Nanchi yanga ku nzubo na kwikala, mu Jizhina ja Yesu Kilishitu, kabiji wikale bulongo. Lesa emupeshe.

<sup>126</sup> Mwaketekela Lesa nyi? [Aye nyenga waamba mba, “Kine nguba. Ee, mwane.”—Waku.] Wamanyikwa na lukatazho lwa ku mu mukupa obe. Obewa wafuma kusa ya uno muzhi, ne obewa. Wafuma ku Owensboro, Kentucky. Jizhina jobe ke ba Mrs. Lamb. Bwelai ku nzubo mukekale bulongo.

<sup>127</sup> Inetu waikala ponkapo, naji wafuma ku Owensboro. Uji na kitumbwa ku jibele jobe papo. Kyafwainwa kutumbulwa, keesha. Yanga, uketekela, ne kwikala na bumi.

<sup>128</sup> Bushe waketekela nyi, mwane? [Aye mulongo waamba mba, “Ee, Naketekela.”—Waku.] Atweba twi benyi umu ku mukwabo. Jizhina jenu ke Mr. Gilmore. Abyo ibyo. Anweba mwafuma ku Anderson, Indiana, ako kuji Kipwilo kikatampe kya kwenda kwa Lesa. Abyo ibyo. Obewa waimana kuno na mambo amwanobe wamanama pacheche. Aye uji na kalepu pacheche. Waketekela nyi? Nanchi yanga ku nzubo ukamutane monka mo waketekela. Kijitu bulongo. Lesa emupeshe. Ikalai na lwitabilo. Ketekelai.

<sup>129</sup> Mwaketekela na muchima wenu yense nyi, mwane? [Aye mulongo waamba mba, “Ee, mwane.”—Waku.] Mwafuma ku Indianapolis. Obewa wi wamwingilo wa Mamboawama. Ao ke mukazhi obe. Uu-uu. Aye ubena kumanama ne aye. Aye uji nalukatazho lwa pa kikolomeno. Dokotala . . . Uji na lukatazho lwa muchima; uji pacheche na lubazhibazhi. Namona kamama mu kutwi kwanji. Kika . . . Iya kuno.

Obewa mupashi wabukamama, mu Jizhina ja Yesu Kilishitu, Na kukambizha na Lesa mumi, mfuma mu mwanamukazhi.

Pano wakonsha kung’umvwatu bulongo pakino kimye. Anweba bonse babiji mwakonsha kuya ku nzubo kabiji mwikale bulongo. Bwelai ku nzubo yenu. Anweba mubena nkung’umvwa, kabiji mwaikalatu bulongo. Anweba musakwikalatu bulongo.

<sup>130</sup> Mwaketekela na muchima wenu yense nyi? Ikalaitu na lwitabilo mwi Lesa. Ketekelai.

<sup>131</sup> Akya kikola kya mashimba ne bintu bikwabo byatama bingi. Anweba mwaketekela mba Lesa usa kwimukosesha nyi? Popo mulupuke kupita momwa. Yanga ku nzubo, na kutakaika Jizhina Janji, ke kwaamba mba, “Nemusachila Anweba, Nkambo Yesu.”

Ene mambo o Najikumwena kyokya bukiji bukiji, awe mwanamukazhi wajinga na kintutu kimo, kikola kya mashimba.

Mwaketekela mba Lesa usakwimulengela kwikalatu bulongo nyi? [Aye mulongo waamba mba, “Ee.”—Waku.] Kijitu bulongo, mwane. Nanchi wendetu bulongo kupita momwa, ne kwaamba mba, “Nemusachila Anweba, Nkambo Yesu,” kabiji yainga ku nzubo.

<sup>132</sup> Kijitu bulongo, nyenga, alulukatu ne kubwela kunyuma, kabiji uketekele. Wakosakana mumanungo obe, uji muno, ne lukatazho lobe lwa muchima, ne bikwabotu. Alulukaitu ne kubwela ku nzubo, ne kwaamba mba, “Nemusachila Anweba, Nkambo Yesu,” kabiji wikaletu bulongo. Ketekelaitu na byonse biji mwi anweba.

<sup>133</sup> Mwaketekela nyi? Pano nga anweba, anweba bantu bamo, mwaketekela nyi?

<sup>134</sup> Inetu wakepa kamubiji waikala poopa, mutwe-ufita, uji na kashita, waketekela mba Lesa usa kwimukosesha? Obewa wikiswa? Kijitu bulongo. Inge obewa wakonsha, Aye ukeyyuba.

<sup>135</sup> Apo paikala musapwishi, waikala papo, ubena kukeba kufwenya kwipi na Lesa. Kechi ibyo nenyi, mwane? Mwaketekela mba Lesa usa kwikyuba nyi? Sutulaiko kuboko kwenu ne kwamba mba, “Amiwa ne kitabizha.” Uu-uu.

<sup>136</sup> Awe inetu waikala papo, wataya kuboko kwanji panshi. Uji na lukatazho lwa bumupashi lo abena kulangulukapo. Abyo ibyo.

<sup>137</sup> Apo paji inetu wachepa mubiji papo, nakumya kana usakwikala na mwaana. Abyo ibyo. Obewa watanwako mu mbung’eno imo yami. Amiwa ne mulaile, na Lesa, mwaana. Kechi ne Kyubile nenyi? Kijitu bulongo. Nanchi yanga ku nzubo na kwikala nanji. Kechi usakamane pa kikyeye jibiji ne.

<sup>138</sup> Bushe mwaketekela na muchima wenu yense nyi, anweba bonse? Anweba bonse ketekelai? Awa Lukunwa wakwa Abulahama ukangata nsakwa, nsakwa ya balwanyani. Bushe obewa wi Lukunwa wakwa Abulahama, mwi Yesu Kilishitu nyi? Sutulaiko maboko enu inge byo muji.

Pano bikai maboko enu pa yemwaikala nanji, pa ye mwaikala nanji, pa umo ne mukwabo. Bikai maboko enu umo pa mukwabo. Angatai nsakwa ponkapano. Ke yenu. Yaikala ke yenu. “Lulombelo lwa lwitabilo lukapulusha bakolwa. Lesa ukebabushapo.” Kijitu bulongo, lombai mu jishinda jenu anweba bene. Lombai jishinda jo mubilamo pa kipwilo kyenu. Lombelelaiko bantu baji ne anweba pa kino kimye. Bikai maboko enu umo pa mukwabo ne kulomba.

<sup>139</sup> Nkambo Yesu, twaiya mu joja jikatampe, Jizhina ja Lukunwa Wazhila wa Mubufumu, Lukunwa wakwa Abulahama, Awo wa mulailwe pa mutumba apo po Mwamumwenejile mwanamukoko; kabiji ne kubika yewa mwanamukoko monka

mwa mungyetu, ke kintu kyabufyafya bingi, pamotu nobe byo Mwaubile na tubaluyeye, keesha.

Nalomba, Anweba Nkambo Lesa, amba Anweba musakutuma bulume, lwitabilo. Kabiji lekai Lukunwa yense. . . Nayuka mba abo bakekyuba, Nkambo, mambo Anweba mwaabile mba, “Awa Lukunwa wakwa Abulahama.” Kabiji inge pajipo umo muno awo ubena kwifwanyikizha kwikala Lukunwa, kabiji kasa abula Lukunwa ne, balekelaiko mambo pa kwimweshwa kuno, nangwa kufwanyikizha. Kabiji lekai Mupashi Wazhila ponkapano abike mweo wabo pa mujilo wa lwitabilo lumi. Lekai Mupashi Wazhila atwele mu muchima yense kabiji ne kubuka muntu yense muno. Baji na maboko abo pa umo ne mukwabo.

Aye Lukunwa Wazhila waabile mba, “Abye biyukilo bikebalondelanga baitabila. Inge babika maboko pa bakolwa, bakakosa.” Kabiji Umo Walaile mulaye uji ponka pano, kasa abena kwimweshwa Ayemwine amba Uji pano. Ao ye Lukunwa uji na maboko abo umo pa mukwabo. “Abye biyukilo bikebalondelanga baitabila.” Lekai Mupashi Wazhila apite pa umo umo pa maboko abo, kuya mu michima ya bantu, ne mu mibiji, kabiji bukai bantu yense uji mu Kyeenyi kya Bulesa. Kiswishai kye, Nkambo.

Namupanga diabola. Napanga kubula luketekelo lonse. Napanga mupashi yense watama. Napanga yense wipashang’anya. Nakajipila bintu byonse byapusanako na Kyambo kya Lesa. Kabiji lekai Mupashi Wazhila asende kifulo Kyanji mu muchima wa bantu, ponkapano, monka mu lwitabilo. Lekai misongo yonse ne bikola byonse, lumanamo lonse lufume pa bantu, mu Jizhina ja Yesu Kilishitu. Amena.

<sup>140</sup> Pano, Lukunwa wakwa Abulahama, anweba kisemi kya bufumu, anweba ba mu mulaye, ku lusa ne bukwasho bwa Lesa, baanga ba mwi anweba bakonsha kusutula kuboko kwabo, ne kwamba mba, “Amiwa natambula kyo Mbena kwipuzha”? Nakusachila. Abo byokiji. Abo mulaye byo aji. Akyo mulaye kyo apaijilwe, pakuuba mba obewa wikale swanyi wa pa bintu byonse, monka mwi Yesu Kilishitu Awo wakupulwishe. Aye wakupulusha kufuma ku bubi. Aye wakupulusha kufuma ku misongo. Aye wakupulusha kufuma kulufu. Aye wakupulusha kufuma ku ngehena. Aye wakupulusha kufuma mu kilende.

<sup>141</sup> Mwaamba mba, “Mulongo Branham, bino atweba bonse tuya mu kilende.” Pakuuba kilende kechi kyakonsha kwitukwachijila atweba ne. Aye waile kwi ayo, ne ayo, bino kechi kyamukwachijile Aye ne. Kyakine. Kechi kyakonsha ku mukwata Aye ne.

<sup>142</sup> “Kyawama, Mulongo Branham, Amiwa natwalwa mu lweseko.” Aye wajinga, ne aye. Bino Aye wakupulwishe kufuma mu lweseko.

<sup>143</sup> “Kechi tutwalwe mu lweseko ne, pakuuba tupokololai ku bubu.” Mwamona, Aye wiikyubile. Ke byenu byonse. Bintu byonse ke byobe, kupichila mwi Yesu Kilishitu. Aye wakupa bintu byonse, byatutu. Kechi kujipo kulipila ne, nangwa kintu kimo ne. Ke byenu ponka pano. Bushe anweba kechi mwasekela pa kikyene nyi? Bushe anweba kechi mujipo nalusekelo na mambo a Aye nyeni? Lusachilo lwikale kwi Lesa.

<sup>144</sup> Pano, kusakwikala mpwijilo, buno, bufuku buno. Ee. Ke bufuku buno, bufuku sebeni-sate. Amiwa nsakuleka ba kafunga be mubuule. Iyai. Iyai.

Pano Pamulungu wiya lukeelo, Nkambo wawama inge waswa, Amiwa nkabwela nakulombelela bakolwa, pa tabbanako, nangwa kuji konse. 🐦



59-1108 Kwangata Nsakwa Yabalwany Babo ke Yabo  
Branham Tabernacle  
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)